

JOANNIS RAII

DE

Variis Plantarum Methodis  
DISSERTATIO

BREVIS.

6

In qua agitur

- I. De Methodi Origine & Progressu.
- II. De Notis Generum characteristicis.
- III. De Methodo sua in Specie.
- IV. De Notis quas reprobat & rejiciendas cenlet D. *Tournefort*.
- V. De Methodo *Tournefortiana*.

---

L O N D I N I :

Impensis *S. Smith & B. Walford*, Societatis  
Regiæ Typographorum, ad Insignia Prin-  
cipis in Cœmeterio D. Pauli. 1696.

1685: 15

P



qu  
pro  
ser  
em  
Et



---

---

# PRÆFATIO.



*U* M in *Præfatione* ad *Stirpium Europæarum extra Britannias nascentium Syllogem* me *plura de Methodo, Deo vitam prorogante virisque & valetudinem largiente, scripturum promiserim, ut fidem datam liberem, Dissertationem hanc Methodo mea Plantarum emendatâ & reformatâ præviam Tibi, Lector, offero, in qua*

*Primò, De Methodi, præcipuè Plantarum, ortu & progressu ago.*

*Secundò, De Notis Generum characteristicis.*

*Tertiò, De Methodo nostra in specie.*

A 3

Quartò

## Præfatio.

Quartò, *Notas nostras Generum characteristicas, quas D. Josephus Pitton Tournesfort, M. D. Parisiensis carpit & rejiciendas censet, defendo quâ possum, aut excuso.*

Quintò, *Ejusdem Tournesfortii methodus cur mihi minus probanda in Genere videtur ostendo.*

Cùm, ut aliquoties alibi dixi, nullam existimem excogitari posse Plantarum methodum, rerum naturis analogam, quæ non aliquas, nè dicam multas, anomalias & exceptiones admittat; eam quâ in Historia Plantarum usus sum suis etiam defectibus & vitiis laborare & ipse animadverti, & ab aliis admonitus sum. Verùm non multum rei Botanica interesse ratus, ut eam, quantum rei natura patitur, emendare & reformare adniterer, aliisque curis distractus à diligentiore ejus examine & censura diu abstinui. Cum tamen mecum reputarem, Virum ingenuum & philalethem errorem agnitum celare aut dissimulare non debere, tum Methodi Generalis defectus necessarios, tum propria

## Præfatio

præparata, quotquot mihi hætenus innotuerè, aperire & agnoscere decrevi.

Dum hæc cogitarem, antequam exsequutus essem, Clarissimus Vir, D. Augustus Quirinus Rivinus, Physiologia in Academia Lipsiensi Professor Novam Stirpium Dispositionem secundum Florum, petalorum numeri respectu, differentias evulgavit.

De qua quid sentirem, quasque ob causas eam minùs probarem, in Præfatione prædicta ad Syllogem Stirpium, &c. ostendi.

D. Rivinus in Epistola non ità multò post ad me data sua defendit, & ab Objectionibus nostris vindicat. Cui dum responsum paro, ad manus meas venièrè D. Tournefort prædicti Elementa quæ vocat Botanica, rectius, me iudice, Methodus Plantarum dicenda, Gallico sermone scripta, in qua Generum summorum notas characteristics à Floris forma seu structura sumit. In hoc opere me sæpius nominatum, totiesque ferè notatum & reprehensum inveni, ut in Epistola ad D. Rivinum dixi.

## Præfatio.

*Hac me ad Methodi originem, naturam, & usum penitiùs introspectendum & curiosius rimandum impulerunt, partim ut collatis inter se & cum nostra aliorum methodis, quæ cui anteferenda esset clariùs discernere & certius judicare possem; partim ut investigarem, quid valeret Methodus, quousque se extenderet, quisque præcipuus Methodi Generalis usus esset. Subductis tandem rationibus inveni, Naturam in plerisque Methodum affectare, non tamen in omnibus observare, sed, ut alibi dixi, Species quasdam producere singulares & sui Generis, alias incerti, ut ita dicam, laris, & ob convenientiam in diversis partibus ad plura genera revocabiles: Imò Genera ex infimis multa, nulla ferè similitudine aut cognatione inter se juncta, exceptis, generalibus quibusdam notis, convenientiâ viz. in Floris forma ejusve petalorum numero; Fructûs aut Pericarpîi figura, constitutione, divisione &c. Cum autem certissima convenientia in eadem natura nota sit plura habere Attributa communia, Genera illa communi aliqua natura seu essentia non convenient.*

## Præfatio.

nient. Proinde Genera summa seu Classes illa quarum Nota prædictæ sole constitutivæ sunt, genuinæ & à Natura definitæ non erunt. Nec tamen ulla institui potest Methodus Generalis, plantas omnes complectens, quæ hujusmodi Genera non necessario admittat.

Quod cum ita sit, nullam video rationem, cur à fructu, radice, aut alia quavis parte aequè ac à Flore, si certiores magisque obvias & manifestas, paucioribusque anomaliis & exceptionibus obnoxias notas exhibeat, Generum characteristica non possint sumi: Et in specie cur notæ à pluribus siliquis disjunctis eidem Flori succedentibus; aut à Fructus pericarpio seu pulpa molli semina ambiente, tunica tenui vestita desumptæ, cum clara, distinctæ, & unicuique facile observabiles sint, nec ità multis herbis communes, pro Generum characteristicis non debeant adhiberi, quantumvis Flores vel formâ, vel petalorum numero differant, a quo imò potiori jure quàm quæ à Flore monopetalo aut polypetalo, regulari aut irregulari



## Præfatio.

regulari petuntur, cum species subjectæ ( ut in multis facile esset ostendere ) partibus præterea omnibus & Accidentibus differant. Interim tamen reliqua ex his Generibus anomalis, quæ certis & manifestis notis à Fructu ejusve pericarpio, aut alia quavis parte sumptis non conveniunt, à Floris forma ejusve petalorum numero distinguenda & ad Classes reducenda esse concedo.

Monendus autem est Lector; Quod quamvis Universalia in rerum natura non existere, sed Intellectus humani mera fragmenta esse affirmaverim, fundamentum tamen in re habere non negem, nimirum convenientiam seu similitudinem in partibus & proprietatibus præcipuis. Hæc autem convenientia tanta est, præsertim in rebus animatis, ut Individua ejusdem speciei ad idem exemplar seu ideam in mente Divina facta videantur, quemadmodum in rebus artificialibus duæ ejusdem speciei machine ad eandem in mente Artificis ideam compositæ sunt. Quinimo Individua Animalium, & fortasse etiam



## Præfatio.

etiam plantarum, non intestino partium communis alicujus materiae motu produci, sed à Deo simul omnia initio creata fuisse verisimile est. Nam semina ipsarum etiam plantarum nihil aliud esse videntur quàm plantulae parvae cum matribus con-natae, nec ulla continuitate cum eis uni-ta. Unde sequitur, species hasce à se in-vicem essentialiter distingui, & intrans-mutabiles esse, earumque formas sive es-sentias, vel principia quaedam sui Gene-ris esse, hoc est particulas quasdam mini-mas materiae, ab omnibus aliis distinctas & naturaliter indivisibiles, vel λόγους quosdam οὐρεμακρὸς idoneo sui generis vehiculo inclusos.

Ceterum nemo existimet me ob defectus prædictos Methodum Plantarum generalem vilipendere & rejicere, nam è contrario utilissimam eam judico tum ad Generalem Stirpium omnium conspectum menti simul exhibendum, quo Intellectus mirè illustratur & delectatur; tum ad Botanicæ compendio docendam discendamque & me-moriâ diutius retinendam: Cujus ope  
plus

## Præfatio.

plus biennio proficiet Herbariis sacris  
mitiata juvenus, quàm absque ea to-  
to decennio, ut *Clarissimi Viri D. Petri*  
*Hotton in Oratione inaugurali ad mu-*  
*nus Professorium in Academia Leydenfi*  
*verba usurpem.*

*Methodum tamen illam ità accommoda-*  
*tam vellem, ut Genera omnia complectatur,*  
*quorum species cognata inter se sunt, &*  
*plura attributa communia habent; nec ul-*  
*las manifestè congeneres & cognatas se-*  
*paret: Et quod ad genera illa attinet quæ*  
*nulla inter se affinitate conjuncta sunt,*  
*sed Generalibus duntaxat notis à flore vel*  
*fructu sumptis conveniunt, ea à conve-*  
*nientia illa communi vel in Floris figura*  
*aut petalorum numero, vel in Fructus*  
*partibus aut accidentibus, prout com-*  
*modissimum videbitur, ad Classes seu Ge-*  
*nera reducat.*

*Hujusmodi autem methodus non est quæ à*  
*sola floris forma, ejusve petalorum numero*  
*differentias sumit. Utraque enim non tan-*  
*tum plantas minimè congeneres ad easdem*  
*Classes reducit, quod in multis necessa-*  
*rium*

## Præfatio.

rium est, sed cognatas separat & ad diversa Genera refert, ut in utraque facile esset ostendere. In priore enim Bulbosæ iisque affines, quæ manifestè congeneres sunt, Floris figurâ plurimum differunt. Tournefortius equidem has non separat, verum in eo Methodum sibi præscriptam deserit; quod nec ipse diffitetur, cum scribat se Florem Liliaceum Bulbosis tribuere, non tantum quia in plerisque speciebus Flos Liliaceum refert, sed præcipuè, quia capsulam post se relinquit in tres cellas divisum ad modum Lilii: unde à Fructu præcipuè hujus Generis characteristicam sumendam concedit. Idem & in Asperifoliarum Genere facit: Iis enim triplicis formæ flores tribuit, nimirum Infundibuli, pelvis [ Molette ] stella, & tamen omnes congeneres facit. Annon ergo meritò rejicienda est ejusmodi Methodus, quam Autor ipse sequi non audet, sed rei evidentia coactus aliquoties deserit. De Posteriori Methodo, quæ à petalorum in Flore numero Plantas distinguit, in Præfatione ad Syllogem Stirpium, & in Epistola ad D. Rivinum dixi.

## Præfatio.

*dixi. Nostra autem Methodus hoc vitio quantum noverim, non urgetur, ideoque eo saltem nomine utrique prædicto præferenda est.*

*Siquis cum Rivino objiciat, Me Classibus nonnullis species subjecisse quibus character Genericus non convenit, ut v. g. Pentapetalis vasculiferis Alfinas quasdam tetrapetalas. Respondeo, Hoc à me factum, Quia plantula hæc aliis præcipuis notis cum Alfinis convenirent, ideoque ab iis separanda non erant; nec tamen quia reliquis omnibus hujus Generis commune esset Florem habere pentapetalon, ob unam vel alteram plantulam character Genericus immutandus, totaque methodus, quæ Plantas flore perfectæ & vasculo seminali donatas disposuisssem, subvertenda videbatur. Nec tamen hoc adeò absurdum videri debet, cum idem à Botanicis in aliis Generibus factum sit. Sic Convolvuli nomen Dorycnio Cretico Alpini, invito Etymo, quamvis scil. non scandat, tribuitur, ob similitudinem in aliis cum reliquis Convolvulis; quod idem de Periclymeno*

## Præfatio.

riclymeno recto dicendum. Verum nè  
Præfationis modum excedam, quæ dicenda  
supersunt ad Methodum Stirpium brevi e-  
dendam differo.

---

DISSER-

---



—

I

—



v  
tu

P  
b  
ju  
g  
h  
re  
c  
n  
a  
f  
d  
s  
i  
l  
r



# DISSERTATIO NOVA DE

## *Variis Plantarum Methodis.*

### *De Origine & Progressu Methodi.*



Uicquid existit in rerum natura res est singularis seu individua.

Universalia sunt Entia rationis seu figmenta Intellectûs humani, res singulares inter se conferentis, earûmque convenientias & differentias observantis, iisque quæ inter se conveniunt idem nomen imponentis. Atque hinc origo est tum *Linguarum*, tum *Methodi*.

Quamvis enim Linguam aliquam primævam *Hominibus Protoplastis* Divinitus inditam aut collatam fuisse minimè dubitem: si tamen illis (quod licet supponere) nullum huiusmodi donum indultum fuisset, quin sibimet relictis Lingua aliqua proprio Marte invenienda aut formanda esset, hoc modo, ut opinor, rem aggressi fuissent. Res singulares, quæ solæ, ut dixi, existunt, & sensus nostros feriunt, contemplati, earum multis maximam inter se similitudinem intervenire in omnibus ferè partibus & accidentibus, animadvertissent, iisque unum idemque nomen imposuissent; adeoque res omnes quarum notitiam habuere, in quasdam quasi turmas divisissent, cuiusmodi turmas Philosophi *Species infimas* vocant. Huiusmodi rerum in species saltem infimas divisio, & Nominum Generalium impositio, ad Linguae communis institutionem & usum omnino necessaria videtur. Nam si Individuis nomina imponerentur, vo-

cùm numerus pro numero Individuorum infinitus aut indeterminatus esset : Voces etiam quotidie mutarentur ; individuis enim aliis indies intereuntibus, aliis subnascentibus, nomina quoque alia interciderent, & nova cudenda essent. At neque lingua illa, qualis qualis, latius posset propagari quàm inter eos quibus eadem Individua cognita & familiaria essent, ut alia omittam.

Speciebus infimis sic constitutis, cùm Homines eas inter se conferrent, nonnullas insigni aliquo vel partium apparatu, vel facultatum seu proprietatum concursu, inter se convenire & ab aliis differre animadverterunt, alias enim partes quasdam situ, figurâ & usu differentes, quas *Organicas* vocant, obtinere observârunt ; in aliis nullam ejusmodi partium distinctionemprehenderunt ; atque his *Inanimatorum*, illis *Viventium* nomen indiderunt. Deinde è *Viventibus* seu *Animatis* alias sensu & motu spontaneo gaudere observârunt, alias sola nutritionis & auctûs per alimenti intus susceptionem & distributionem facultate præditas esse ; atque illas *Animalium* nomine donârunt, has *Vegetabilium* seu *Plantarum*.

Plantas postea inter se conferentibus occurrebant statim notæ insignes quibus aliæ inter se convenirent & ab aliis differrent, nimirum hinc Magnitudo insignis, superficiei duratio diuturna, & materie soliditas seu substantia lignosa ; illinc Magnitudo contractior, statura humilior, duratio brevior, & substantia mollior. Quibus priores notæ convenère *Arborum* nomen indiderunt, quibus posteriores *Herbarum*.

Tandem cùm animadverterent nonnullas quarum superficies diu duraret, & substantia lignosa esset, ab aliquibus, quæ minùs durabiles essent & quarum materia mollior, magnitudine æquari vel etiam superari, has ab illis quæ statura & magnitudine herbas maximas excederent, & persæpe etiam monostelechæ essent, distinxerunt, & his *Fruticum* nomen imposuerunt, illis *Arborum* reliquerunt.

Nec Ego sane video, cur hæc Distinctio Stirpium in *Arbores*, prout illa Vox ad *Frutices* extenditur, & *Herbas* satis accurata & Philosophica censeretur non debeat : cùm notæ quibus eas distinximus certæ & manifestæ sint, & à Botanicis, omnibus agnoscantur ; qui quotiescunque stirpes herbarum similes substantiâ lignosâ constantes & per plures annos durabiles memorant, vel Fruticis Arborisve titulum, vel Arborei epitheton iis adjiciunt.

Ego

Ego autem ut *Fruticum* numerum decurtarem, & nè ab Herbis, quantum possem separarem, quæ Flore & Fructu cum eis convenirent, Gemmarum in ramis aut surculis productionem notam feci quæ *Frutices* à *Suffruticibus*, qui materiâ lignosâ & superficiei durabilitate cum iis convenire videntur, distingui possent.

Interim tamen modò hæc distinctio Arborum ab Herbis, quæ in substantia lignosa, superficiei durabilitate, & Gemmarum productione consistit, teneatur, unicuique, per me licet, liberum esto, Frutices humiliores, qui cum Herbis, Flore, Fructu, Foliis, totâque specie externa conveniunt, cum eisdem, ut v. g. *Ketmiam* cum *Althæis* dictis conjungere & unâ tradere, quod & fecerunt, qui Arborei ab Herbis toto Genere diversas agnoverunt. Humiliores, inquam, nam Frutices proceriores aut Arborei, ut v. g. *Acaciam Americanam* cum *Glycyrrhizâ* copulare nimis absurdum & incongruum videtur.

*Arboris* & *Herbæ* Generibus sic constitutis, Curiosiores & Philosophi, ingentem in utroque sed præcipuè *Herbarum* Genere specierum numerum confusionem, & in iis addiscendis & memoriæ mandandis difficultatem parituram considerantes, ut memoriæ & doctrinæ consulere, eas adhuc in Genera inferiora seu subalterna dividendas censuerunt. Quod variis modis aggressi sunt. Nonnulli enim à loco natali; Alii à viribus aut usibus quos hominibus præstant in cibo & medicina eas distinxerunt; minùs commodè aut æqualiter. Plerique à convenientia partium præcipuarum *Radici*, *Caulis*, *Foliorum*, *Florum*, *Fructuum*, in Figura, Situ, aut Proprietatibus seu Accidentibus insignibus notas Genericas sumpserunt. Sic à *Radici* figura & compositione *Bulbosum* Genus sumptum est; A *Caulis* motu *Scandentium*; A *Florum* & *Seminum* situ, & simul sumptorum figura. 1. In summis ramulis, *Umbelliferarum*. 2. Ad caulium nodos, verticillorum modo eos ambientium, *Verticillatarum*. A *Florum* figura, vel *Papilionem* referente, *Papilionacearum*; vel *Campanam*, *Campaniformium*; Ab eorundem compositione & corymbi similitudine, *Corymbiferarum*. A *Pericarpiorum*, pulpa molli, tunica crassa constantium, magnitudine, *Pomiferarum*; Ab eorundem pulpa molli, tunica tenui circumvestita, *Bacciferarum*; A *Pappo* seminibus intrascente, eisdemve intermixta, *Papposarum*; ex quibus illæ, quarum *Calix* squamosus grandis, *Capitata* dicebantur: A

foliorum situ, caules stellæ in modum ambientium, *Stellatarum*; Ab eorundem superficie scabra, *Asperifoliarum*; A Figura, *Rotundifoliarum* & *Graminifoliarum*; A Textura, *Nervifoliarum*; A consistentia denique, *Succulentarum*. Tandem cum hæc Genera Herbas non exhaurire viderent, alia adjecerunt 1. à Loco natali sumpta, ut *Aquaticarum* & *Marinarum*; 2. Ab usibus quos hominibus præstant, ad *Panicula* & *Pultes*, *Frumentacearum*; ad *Inunctus*, acetaria & juscula, *Oleracearum*; ad ornamenta ut v. g. ad ferta & corollas nectendas, ob florum formam & venustatem, *Coronariarum*; ad odoramenta, *Aromatum*.

Ex his Generibus multa, v. g. *Pappifloræ*, *Capitata*, *Corymbifera*, *Umbellifera*, *Verticillata*, *Papilionacea*, *Tetrapetala* *siliquosa*, *Bulbosa*, *Graminifolia*, *Pomifera*, *Asperifolia*, omnium quæ hætenus novimus optima sunt, & si rectè definiantur & limitentur, accurata & Philosophica reddi possunt: nec enim in parte duntaxat illa aut Proprietate unde denominatio sumitur conveniunt, sed in aliis multis, imò toto, ut ità dicam, vultu & habitu. Sic *Umbellifera* dictæ non tantum florum & seminum situ, à quo *Umbellifera* denominantur, conveniunt, sed etiam foliis compositis, & alternatim in caule sitis, floribus pentapetalis, & pariter figuratis, summo fructui in nascentibus, seminibus binis simul junctis, aliisque multis. Idem ostendere facile esset in *Verticillatis*, *Bulbosis*, aliisque superiùs recensitis Generibus. Unde nec illi qui Herbas à convenientia vel *Florum*, seu in forma externa, sive in petalorum numero; vel *Fructuum*, seu in forma Pericarpium seminumve, sive cellularum in quas dividuntur numero, distinxerunt, meliora adhuc invenire potuerunt; imo nulla omnino his paria, quorum scil. Species seu Genera subalterna tot partibus & accidentibus convenirent, totaque specie externa adeò se invicem referrent, ut pro cognatis & congeneribus ab unoquoque; curioso saltem spectatore non possent non agnosci.

Alii denique, quorum præcipui & Antesignani, oculatissimi & eruditissimi Botanici, *Andreas Casalpini*, *Conradus Gesnerus*, & *Fabius Columna*, aliis partibus neglectis, Herbas à *Florum Fructuumve* præcipuè differentiis dividendas censuerunt, quos nos in parte sequimur.



*De Notis Genærum caracteristicis.*

**E**ssentiæ rerum nobis prorsus incognitæ sunt. Cùm enim omnis cognitio nostra originem ducat à sensu, nec quicquam de rebus quæ extra nos sunt sciamus, quàm quòd facultatem habeant hoc vel illo modo sensus nostros afficiendi, & mediantibus hisce impressionibus, talia vel talia phantasmata in Intellectu excitandi; si essentiæ rerum sint formæ immateriales, eas nullo modo sensibus nostris occurrere apud omnes in confesso est: Si verò nihil aliud sint quàm certa quædam proportio & mixtura Principiorum seu minutorum naturalium; cùm minima illa nullo sensu nostro, quantumvis armato aut adjuto seorsim percipi possint, eorum certè figuram aut proportionem sensus nostros fugere & latere necesse est. Quòd minima naturalia sensibus nostris perceptibilia non sint ex visu, qui sensuum omnium subtilissimus est, in corporibus diaphanis patet, quorum nulla omnino pars, nedum minima, visibilis est. Quicquid enim præter corpora luminosa sub visum cadit, lumen reflectit. Si autem partes corporis diaphani, vel omnes vel aliquæ, lumen reflecterent, eatenus certè id opacum esset & non diaphanum; hoc est penitus opacum si omnes lumen reflecterent, vel in parte si aliquæ. Quin nisi respectu exquisitissimorum etiam perspicillorum daretur medium diaphanum quod radios transmitteret, nihil prorsus per ea videri posset.

Cùm ergo essentiæ rerum nobis incognitæ sint, notæ Genærum essentielles à nobis certò sciri non possunt. Quæ tamen plurimis attributis conveniunt ea naturâ convenire verisimile est. *Flos* ergo aut *Fruktus* in plantis partes essentielles propriè dici nequeunt. Quod & aliter etiam demonstratur I. Quòd Plantæ nonnullæ his partibus carent, & quidem è perfectioribus, si *Horti Malabarici* Autori fides, apud quem multæ occurrunt species quæ nec florent nec frugent. Ex imperfectioribus *Fungos* non tantum flore carere, sed etiam steriles esse, seu omni semine destitui, verisimillimum videtur. Florem non producere multis, & quidem Genere diversis, commune est nimirum *Muscis*, *Fucis*, omnibûsque

aquâ perpetuò immerfis, *Ophioglossò* insuper, *Kali geniculato*, & secundum *Tournefortium* ipsis etiam *Capillaribus*. Ergo Florem proferre non est Plantæ essentialē, & notā Generum characteristica aliunde peti possunt quàm à Flore aut Fructu : Nam *Fungum*, *Fucum*, *Muscum*, *Herbas capillares* inter se Genere differre omnes agnoscunt, quæ tamen Florem nullum habent.

2. Plantæ multæ, præsertim ex arboreo Genere, multos annos vivunt antequam florem fructumve edant, ut v. g. *Juglans* viginti circiter annos, *Codda Panna* seu *Palma* quædam species Indica *Talaghas* Cingalensibus dicta, triginta. Quæro, An per totum hoc tempus *Juglans* non sit *Juglans*, an possit esse *Juglans* sine essentia *Juglandis*? Dices, Quamvis *Juglans* per totum hoc tempus nec florem nec fructum producat, habet tamen potentiam eos suo tempore producendi. Respondeo, Potentia hæc res est invisibilis, nec ulli sensui subjecta. Ergò cum *Juglans* per totum hoc tempus notas essentielles *Juglandis* non ostendit, nemo potest certò scire eam esse *Juglandem*. Agricola tamen & Hortulanus illos riderent qui affirmarent se hoc nescire. Dantur ergo aliæ notæ quibus plantæ certò distingui possunt præter flores & fructus, nimirum plura attributa communia, seu similitudo plurium partium & accidentium.

In *Palma Talipot* dicta trigesimus & ultimus vitæ annus expectandus est (nam semel tantum eoque ultimo ætatis anno floret) antequam certò sciri possit eam esse *Palmam*. Quis autem talis notæ usus est.

Sic *Anemones*, prout Genus illud *Ranunculum nemorosum* & *Pulsatillam* complectitur, certissima nota est, Caulē habere simplicem seu non ramosum, determinatè seu ex una tantum distinctione foliatum, unicum in summo florem nudum gestantem, nulla floris figuræ ejusve petalorum numeri habita ratione.

Sic *Marum mastichenum* citius & certius à quocunque Genere *Verticillatarum capitulis* & *verticillis lanuginosis* distinguitur, quàm alia quacunque nota à floris figuræ sumpta.

3. Hæc partes Plantis essentielles non esse vel indè constat, quòd Generationi tantum inserviant, ideòque etiam temporaneæ sint, & decidant aut marcescant, Plantæ etiamnum superstire. Accidens, definientibus Philosophis est quod *adeſt & abeſt sine ſubjecti interitu*. Pars ergo illa quæ potest



potest adesse & abesse sine subjecti interitu accidentalis est. *Radix* potius pars plantæ essentialis est, quia omni plantæ datur, nec abesse potest; aut *caulis*, cujus frustra aut *Schidia*, minimave particulæ in nonnullis speciebus plantam integram continent, & si terræ committantur radices agunt, & folia flores fructum producunt. Certè quæ plantæ ipsius constitutionem, seu individui compositionem ingrediuntur, partes potius essentielles censendæ sunt, quàm quæ Generationi tantum inserviunt. Notæ ergo Generum indices non à *Flore* aut *Fructu* tantum, sed aliunde etiam peti possunt, nimirum à *radice*, *caule* & *foliis*. Ego certè in Generibus constituendis convenientiæ Plantarum in facie externa totòque habitu in texturâ & consistentiâ partium præcipuarum, potissimum rationem habendam esse judico. Unde convenientia in Floris vel figurâ, vel petalorum numero si cætera non respondeant, non sufficit ad genus determinandum. Datur enim species quædam *Hyacinthi stellati*, *Boraginis flore* à similitudine dicta. At nemo unquam Botanicus *Hyacinthum Boragini* congenerem fecit. Datur etiam species *Chunda* seu *Solani Indici* una vel altera, *Boraginis flore* dicta, quæ tamen à *Boragine* toto Genere differt. Præterea quoad floris formam *Orobanche* imò *Orchides* cum *Verticillatis* conveniunt; Florem enim galeatum & labiatum obtinent; quæ tamen Plantæ diversissimæ sunt. At neque *Euphrasia* *Melampyrum*, *Pedicularis* &c. cum *Verticillatis* herbis ob similitudinem florum solam Genere convenire censendæ sunt, cum multis Accidentibus differant; ut v. g. quòd semina non nuda proferant sed vasculis inclusa, nec quaterna tantum in singulis sed in plerisque speciebus multò plura. Adde quòd folia in caulium cymis non semper bina ex adverso sita sunt, quod in *Verticillatis*, quantum memini, perpetuum est, sed solitaria seu alterna. Quinetiam quæ Floris figurâ differunt Genere interdum conveniunt, ut v. g. *Rapunculi campanulati* & *corniculati*. At neque *Speculi Veneris* dicti flos cum *Rapunculi campanulati flore*, neque *Speculi Veneris Thracici* cum reliquis ejusdem [Spec. Ven.] speciebus convenit. Nec *Polygonati* species omnes floris formâ inter se conveniunt, cum *Polygonatum latifolium ramosum* flores habeat *Lilii convallium* persimiles, quæ dissimilitudo ipsius *Tournefortii* iudicio sufficiens est ad differentiam Genericam constituendam.

Earum etiam quæ Flore carent Genus, ut dixi, à vultu totòque habitu, texturæque & constitutione partium facile cognoscitur. Quis enim etiam è vulgo *Fungum* vel *Fucum* vel *Muscum* fortè oblatum non statim agnoscat, & interrogatus quid sit, *Fungum* vel *Fucum* vel *Muscum* esse non respondit? nec tamen alias habet notas quàm faciem externam, & habitum plantæ.

Quinimo in nonnullis Plantarum, etiam perfectiorum, Generibus, quæ Flore Fructuque gaudent, notas characteristicas à Flore aut Fructu, aut utroque simul sumi non posse sic demonstro. *Lupulus* est planta Botanicorum omnium consensu perfecta; at verò *Lupuli* notæ characteristicæ nec à Flore, nec à Fructu, nec ab utroque simul peti possunt. Non à Flore, quia *Lupulus* *femina* Florem non habet; Non à Fructu, quia *Lupulus* *mas* Fructu caret; Non ab utroque simul, quia Neuter, hoc est, neque *Femina* neque *Mas*, Flore Fructuque simul donatur. *Lupuli* ergo notæ Genericæ, aliunde nimirum à figura & situ Foliorum, & caulis motu, aliisve partibus sumendæ sunt. Idem de *Mercuriali*, *Cannabe*, reliquisque plantis sexu distinctis dicendum est. Nec video quomodo vis hujus argumenti evadi aut eludi possit, modò concedamus, quod omnino concedendum est, nimirum Notam alicujus Generis aut Speciei characteristicam omnibus & solis, vel saltem plerisque, sub illo contentis, seu speciebus, seu individuis, convenire debere. Quis unquam credidisset *Lupulum* *marem* & *feminam* eandem specie plantam fuisse, si nec caule, nec foliis, nec radice convenissent? A convenientia ergo in his partibus *Lupuli* notæ sumendæ sunt.

Nec dici potest, *Lupulo* accidentarium esse ut florem & fructum disjunctos & totis plantis separatos producat, cum hoc ei naturale & perpetuum sit, nec eandem plantam florem simul & fructum proferre unquam observatum fuerit.

Cur ergo, inquires, notas Generum characteristicas à convenientiis florum & fructuum præcipuè sumendas esse concedis?

Respondeo, Quia in plantis cætera similibus hæ partes quibus adsunt plerunque conveniunt, suamque figuram constantius servant & minus variant, quàm aliæ quæcunque suntque ob figuram, colorem, aliave accidentia insignes, conspicuæ & facile observabiles. Quod si aliæ partes proprietates quasdam toti alicui Generi communes, & soli proprias

propriis obtineant, non video cur ejusmodi proprietates pari jure adhiberi non possint pro Generis illius notis ac Florum aut Fructuum formæ aut qualitates similes.

Sic *Radix tunicata*, hoc est, ex pluribus tunicis, in orbem se amplexantibus composita, & ex ima sede fibras emittens, Generis *Bulbosi* strictè dicti optima nota est. Sic *Graminis* notæ Genericæ à caule & foliis rectè desumuntur. Nam quæcunque planta, flore stamineo prædita, caulem habet teretem, geniculatum, foliis ad singula genicula singulis, alternatim positis, à lato principio in acutum mucronem sensim desinentibus cinctum, *Gramen* est. Sic *Cyperus* foliis gramineis, caule triquetro, si florem stamineum addas, ab aliis omnibus plantis satis distinguitur. Sic *Juncus*, in eodem Genere flore stamineo præditarum, foliis longis, angustis, crassis, fungosa medullâ repletis abundè innotescit, ut aliis notis non sit opus. Sic Foliorum in caule situs ad plantas *Verticillatas* ab *Asperifoliis* dictis distinguendas plurimum conducit; in his enim alterno aut fortè nullo ordine sita sunt; in illis bina ex adverso respondent, cui si addas situm florum in pediculis è foliorum alis egressis, & femina in singulis perianthiis quaterna nuda; hæ notæ, floris figurâ neglectâ, sufficiunt ad hoc Genus à reliquis omnibus distinguendum.

Sic Foliorum numerus binarius, & situs in caule adversus, ad *Bifolium*; Caulis divisio dichotoma, ad *Valerianellam* seu *Locustam* herbam dictam, ab omnibus, nobis saltem cognitis, stirpibus distinguendam sufficit.

Sic, *Equiseto*, folia tubulosa; pyxidatim articulata, cum nulla partis pronæ & supinæ distinctione, habere, omni & soli convenit.

Sic *Brassicam* à *Napo* aut *Rapa* flore aut fructu ægrè distingues, foliis autem facillimè.

Sic *Tournefortius* ipse folia laciniata *Chamæmeli* characteristicam facit; situ florum solo *Thymum*, *Satureiam*, *Thymbram* distinguit.

Quinimo Florum situs certiores Generum notas, interdum, exhibet quàm eorundem vel Forma, vel Petalorum numerus: idque respectu vel *Caulis* vel *Fructus*.

Situs Florum *caulis* respectu, nimirum 1. In *Umbellis* caules plerunque terminantibus, vel saltem ramulos ex eorum geniculis exeuntes, prout *Umbella* accipitur pro summo caule summisve ramulis, in plures ab eodem puncto  
ortos

ortos radios divisís, & singulis radiis in plures itidem pediculos, qui flores sustinent subdivís, cujuscunque figuræ, five conicæ, five sphæricæ, ea summitas sit; Generis *Umbelliferi* strictè dicti optima nota est. 2. In *Verticillis* ad caulium nodos, *Verticillis* eo quo jam dixi sensu acceptis, *Verticillatarum* characteris pars est.

*Fructus* respectu Flores diversimodè sibi sunt: nimirum vel à *Fructu remoti*, idque vel totis Individuis ut in *Lupulo*, *Camabe*, *Mercuriali*, *Spinachia*, & *Arboribus* nonnullis *juliferis*: vel in eodem individuo, ut *Frumento Indico*, *Lachryma Jobi*, *Sparganio*, *Ricino*, *Heliotropio triccoco*, *Ambrosia*, *Palmis* nonnullis, &c. Vel *Fructui contigui*, ique vel *summo Fructui* insidentes, vel *basi Fructus* cohærentes.

In priore genere, hoc est, iis in stirpibus quarum Flos *summo Fructui* insidet, *Fructum* ipsum pro *calice* habet *Tournefortius* quia scilicet *Florem* sustinet: In posteriore, seu in quibus Flos *basi Fructus* cohæret, *Fructum* ejusve rudimentum *Stylum* esse vult, *Clariss. Malpighium* in eo, ut opinor, secutus; partem illam quam alii pro *stylo* accipiunt *styli* appendicem faciens. Hanc sententiam in *Epistola* ad *D. Rivinum* his rationibus impugnavi. *Primâ* à *Calicis* seu *Perianthii* vocum significatione sumptâ. Quis enim feret *Calicem* aut *Perianthium* in *Genere* v. g. *Herbarum Pomiferarum* dici, quod nec *Florem* totum nec ullam ejus partem tegit aut continet, nullamque omnino cum *calice* similitudinem habet? *Secundâ*, Quia nulla certior (ut mihi videtur) distinctionis partium in plantis nota est, quàm quòd una ab alia sponte abscedat, ac si tantum contigua ac coaptata esset. At in Plantis nonnullis, quarum *calix* secundum *Tournefortium* in *fructum* abit, seu major *Fructus* sit, ut v. g. *Lyfimachia siliquosa*, *Calix* integer una cum flore à *Fructu* sponte abscedit & decidit: in *Bryonia alba*, & *Lyfimachia lute Virginia-na*, non *calix* tantum sed & ejus *pediculus* quâ *Fructui* committitur. *Tertiâ*, Si *Fructus* *calix* ejusve pars sit, cur non & *pediculus Fructus* qui ei continuus est in *Pyris*, *Pomis*, &c. ad *calicem* quoque pertineat? *Quarta*, Si ad *Calicis* nomen *Fructui* tribuendum sufficiat, quòd *florem* sustineat, cum in multis *Herbarum* generibus, præcipuè in *Pomifera* Flores multi steriles, h. e. quibus nullus succedit aut subest *Fructus*, reperiantur, Flores autem hosce *pediculus* gestet & sustentet eodem prorsus modo quo *Fructus* fertiles; nullam video rationem, cur *calicis* nomen *Fructui* in his concedatur,



## DE VARIIS PLANTARUM METHODIS. 11

cedatur, pediculo (cùm idem officium præstet) in his denegetur. *Quinta*, Quæro an Plantæ illæ in quibus Fructus flori subest stylum habeant necne? Si negas, à communi loquendi & sentiendi usu abhorres, cùm omnes hæcenus Botanici partem illam quæ medium florem occupat, & rudimento fructus aut seminis cohæret, pro stylo habuerunt in quibus & ipse *Tournefortius* est. Si affirmas, homonymiam incurris, stylum in his pro appendice fructus in illis pro fructu ipso accipiens, seu eidem parti nunc styli, nunc appendicis styli nomen tribuens.

His adde, Quod si Fructui sufficiat ut pro Calice habeatur, quod Florem sustinet; cur cauli aut pediculo in *Tulipa*, *Hyacintho*, *Polygonato*, *Lilio convallium*, *Aquilegia*, aliisque, quæ pro Herbis flore nudo haberi solent, & ab ipso *Tournefortio* habentur, cum flore sustineant, calicis nomen tribui non debeat, adeoque nullæ sint omnino Herbe flore nudo.

Deinde, Quid de *Mirabili Peruviana* dicemus, cujus flos (id adnotante *Tournefortio*) summo fructui insidet, & calice nihilominus, (fructus basin ambiente eodem modo quo flos in aliis) unà cum fructu ejusve embryone continetur?

*Tertio*, Quæri potest, An semina nuda flosculis partialibus totalem componentibus in Herbis flore aggregato seu composito, calicis loco sint, cùm flosculos sustineant; adeoque non distinguenda sint ab iis quæ in vertice calicem gestant v. g. *Scabiosa*, &c. cùm tamen *Tournefortius* ipse *Scabiosam* aliasque congeneres plantas à reliquis Herbis flore ex flosculis composito, hæc notâ distinguit: *Classis duodecimæ, Sectioni sextæ, cujus primum Genus est Scabiosa, titulum faciens, Herbe flore composito è flosculis irregularibus in Capitula congestis, quorum unusquisque calicem habet privatum seu peculiarem.*

Deinde, Quærere à D. *Tournefortio* liceat, Quomodo in Rubeolæ speciebus nonnullis flos nudus esse potest & tamen à fructu gestari seu sustineri, ut ille *Elem. Bot. p. 106.* tradit: cùm fructus ex illius sententia in hoc casu calix sit; si ego saltem mentem ejus capio.

Distinctio hæc florum à situ, Fructuum respectu, sumpta mihi in Historia Arborum ad Genera distinguenda summo-  
pere utilis fuit, absque eo quod abusivè admodum & improprie, contra communem loquendi usum & ipsam rei veritatem, Fructui nunc *styli*, nunc *calicis* nomen tribuerem.

Hæc eò latius profecutus sum, ut eos præjudicio liberarem, qui *Flores* & *Fructus* partes Plantarum essentielles esse, nec no-  
tas

tas Generum characteristïcas aliunde quàm ab illarum vel partibus, vel forma externa aliisque accidentibus sumi posse aut debere sibi imaginantur.

Notandum insuper, 1. Quod Character cujuscunque Generis optimus est Proprietas aliqua singularis omnibus & solis istius Generis speciebus conveniens, à quacunque tandem parte sumatur, quia memoriam non onerat, quin facillè addiscitur & retinetur, nec nullus indè erroris metus: quemadmodum Plantarum aliarumque rerum naturalium nomenclaturæ quò breviores sunt eò meliores, omniumque optimæ uno verbo conceptæ, præsertim si à similitudine cum re aliqua notissima sumantur. Sic *Oculus Pavonis* nomen quod *Goedartius* cuidam Papilioni diurno imponit, mihi citius & clarius speciem illam in mentem revocat, quàm si titulum longiorem quàm Botanici recentiores plantarum speciebus solent, ei præfixisset, icone nulla adhibita. 2. Quòd in iis generibus, in quibus nota aliqua seu proprietas singularis, omnibus speciebus communis & solis propria non occurrat (quæ longè maxima Generum pars sunt) ad complendum alicujus characterem totidem notas toti illi Generi communes sumendas esse, quor in nullo alio omnes simul possunt inveniri. Nam quæ pluribus partibus conveniunt, seu quibus plura attributa communia sunt, pro congeneribus habenda sunt. Præterea, satius esse existimo, pro Characterè cujuslibet Generis notas obvias, manifestas & insignes adhibere, quamvis uni vel alteri plantæ in reliquis satis simili hujus Generis speciebus, non conveniant, quàm eas rejicere, & alias non facillè observabiles, à Flore & Fructu sumptas, substituere. Sic v. g. *Convolvuli* caulibus scandere optima nota esse videtur, quantumvis *Dorycnio Cretico Alpini*, quod in aliis *Convolvulum* satis refert, & *Lychmidis sylvestris* speciei *Myconi* non conveniat.

Hoc enim Genus solum è convolventibus se fruticibus, herbis, aliisque adminiculis vicinis, florem habet campaniformem.

Interim tamen non negaverim divisionem Plantarum à Floris formâ structurâve, vel ab ejusdem figura regulari aut irregulari, vel deniq; à petalorum numero sumptam, utilitatem aliquam habere ad Methodum pro *Historia Stirpium generali*, instituendam, quia species omnes complectitur & exhaurit, adeoque in ejusmodi *Historia* Botanices studiosi plantam quamcunque oblatam absque indicis ope facillè invenire possunt. Classes tamen seu Genera superiora in hujusmodi methodo  
natura



natura non convenient, cùm nulla præterea attributa communia habeant, quæ ut superius dixi, certissima est convenientiæ in eadem naturâ nota. Cùm enim naturæ rerum nobis incognitæ sint, quæ certior nota esse potest naturæ communis quàm multa attributa communia, seu similitudo plurium partium & accidentium? Jam verò quæ quæso similitudo est inter *Rosam*, *Papaver*, *Rutam*, *Ranunculum*, *Cissum*, præterquam in floris forma? Quæ convenientia *Epimedio*, *Potamogitoni*, *Herbæ Paris*, vel inter se, vel cum *Tetrapetalis* filiquosis, si petalorum in flore numerum & situm excipias? Quid aliud sunt *Monopetalæ* flore irregulari, (exceptis verticillatis & flore labiato donatis) quàm scopæ dissolutæ? ne plura memorem; quæ *Tournefortius* ad easdem Classes reducit. Cur ergo, inquires, Tute ipse Quarti Generis herbas à petalorum in flore numero dividis in *Monopetalas*, *Tetrapetalas*, *Pentapetalas*. Respondeo, Quia in Historia stirpium generali & Methodo omnes complectente, aliquo modo dividendæ erant; Divisio autem commodior non occurrebat: nec enim ego eam pro accuratè Philosophica unquam venditavi: nec scio an Rerum natura talem admittat: paratus tamen meliorem siquis docuerit amplecti. Quamvis autem Methodus nostra plantas aliquas alienas, nec ullis fere notis præter generales convenientes conjungat, cognatas tamen, quod sciam non separat.

Summa dictorum huc redit.

Naturâ convenire & Genere convenire idem est.

Naturæ seu Essentiæ rerum nobis incognitæ sunt.

Convenientiæ in eadem Natura seu Genere nulla certior nota seu indicium esse potest quàm plura Attributa communia.

In Plantis illis quæ naturâ conveniunt seu plura Attributa communia habent nota alicujus Generis characteristica optima est Proprietas aliqua singularis omnibus & solis istius Generis speciebus conveniens.

Quibus non datur ejusmodi Proprietas, vel nobis non innotescit, pro nota cujuscunque Generica tot Attributa communia sumenda sunt quot nulli præterea Generi simul sumpta convenient.

Plantæ omnes in Genera summa quæ plura Attributa communia habeant nondum divisæ sunt, nec scio an dividi possint. Certè divisio vel à Floris forma, vel ab ejusdem petalorum numero sumpta ejusmodi Genera non exhibet.

Ex

Ex summis Generibus hætenus cognitis omnium optima sunt eorum bona pars in quæ superioris seculi Botanici peritiores Herbas distribuerunt; nimirum *Fungorum, Muscorum, Fucorum, Capillarium, Umbelliferarum, Verticillatarum, Asperifoliarum, Stellatarum, Papilionacearum, Pomiferarum, Papposarum, Capitatarum, Corymbiferarum, Bulbosarum, Graminifoliarum* Genera: eorum enim species non tantum generali notâ conveniunt, sed & alia præterea attributa communia habent. Verùm cum Herbas omnes non exhauriant hæc Genera, alia præterea ab iis qui *Historias* aut *Methodos* stirpium generales componunt necessariò adjiçienda sunt. Quæ autem hætenus adjecta fuere, notis characteristicis vel à florum forma, vel à petalorum numero sumptis, species aliquas sub se continent nulla ferè partium aut accidentium similitudine junctas.

Quid ergo, inquires, profecimus ex Neotericorum laboribus? Quid magni, quòdque tanto plausu excipi mereatur, præstiterunt nuperi Methodistæ?

Nemini detractum vellem. De Botanices studiosis optimè meriti videntur, 1. quòd Genera infima accuratiùs definierunt, & à se invicem distinxerunt, notis vel à florum, vel à fructuum, vel ab utrorumque simul differentiis petitis, speciebus omnibus & solis convenientibus; unde plantas non paucas locis alienis dispositas ad proprias suas sedes transtulerunt, & studiosis notas seu tesseras dederunt, quibus in memoria retentis, quamcunque plantam inventam aut oblatam ad quod genus pertineat, illico agnoscant.

Superioris quidem seculi Botanici plantis à se observatis aut inventis à similitudine aliqua cum jam cognitis nomina imposuere. Verùm non semper à similitudine seu convenientia in parte aliqua principali & maximè distinctiva, *Florè* v. g. aut *Fructu* sed interdum à parte aut *Accidente*, vel non omnibus istius Generis speciebus, vel aliis pluribus communi, ut *Folio* aut *Radice* aut *Caulis motu*, &c. eas denominarunt; adeoque ad Genera aliena & impropria retulerunt. Sic *C. Bauhinus*, ob foliorum ut puto, similitudinem *Apocynum* rectum *Ægyptiacum* ad *Lapathum* retulit. *Jo. Bauhinus* Helxinem *Cissampelon* semine triangulo, quòd pariter caulibus scanderet, reliquis *Convolvulis* annumerat. Non inutiliter ergo Recentiores in hisce emendandis, notisque Generum characteristicis certis, clavis, & genuinis investigandis desudarunt.

Deinde

Deinde 2. Plantas omnes in Classes seu Genera summa distribuerunt, quorum species notis insignibus à Florum aut Fructuum differentiis petitis convenirent, quamvis aliàs earum multæ nulla ferè cognatione junctæ essent : quæque species omnes complecterentur nullâ anomalâ relicta.

Dicēs, Si hujusmodi Herbarum Divisio, Florum v. g. respectu, in *Monopetalas*, *Tetrapetalas*, *Pentapetalas*, &c. flore *uniformi* & *diffirmi* donatas, species omnes exhauriat, cur Tu qui eâ uteris *Anomalarum* Genus admittis ?

Respondeo, Quia Herbæ nonnullæ nondum à quoquam perfectè descriptæ sunt, adeoque nesciverim quales flores aut fructus haberent, proinde & ad quod Genus referendæ essent.

2. Quia Herbæ nonnullæ quæ pro congeneribus ab omnibus Botanicis habentur, notis à foliorum forma totâque facie externa & loco natali sumptis, ut v. g. *Nymphaea*, florum & fructuum structurâ differrent, adeoque ad diversâ Genera distrahendæ essent.

3. Quia species quædam singulares essent, nec notis characteristicis cum aliis quibuscunq; convenirent ; incongruum autem videbatur pro Generibus tradere ; quæ unicam tantum speciem haberent.

4. Quod quæ Floris formæ aut Petalorum numeri respectu convenirent nulla persæpe cognatione junctæ essent, nec ulla præterea similitudine se invicem referrent, ideoque ob hanc dissimilitudinem in toto habitu & constitutione eas seorsim exhibere malui, quàm ob convenientiam in generalibus hisce notis ad idem Genus reducere. Superest, ne quid dissimulem, ut objectioni occurram quæ contra ea quæ superius dixi de optima & ærtissima convenientiæ Genericæ nota, nimirum *plura habere Attributa communia*, moveri potest, Hinc scil. sequi *Malvam arboream* cum *Herbacea*, item *Sambucum humilem* cum *arborea*, aliàsque multas hujusmodi plantas, Genere convenire, cum multa Attributa communia habeant v. g. *Florem*, *Fructum*, *Folia*, &c. similia. Cui respondeo, Ob paucas quasdam plantas in Genere Arboreo & Herbaceo, quibus plura Attributa communia sunt ; non tollendam esse distinctionem inter Arbores & Herbas, quia multò plures sunt in quibus nulla hujusmodi convenientia observatur. Deinde notæ illæ insignes Arborei Generis, nimirum excessus magnitudinis maximarum in hoc Genere præ maximis in illo & minimarum præ minimis, substantia lignosa, Superficie

Superficiæ duratio diuturna, & Gemmarum tandem productio, plus apud me valent ad illas distinguendas, quàm Florum, Fructuum aliarumque partium similitudo ad conjungendas.

### De Methodo nostra in Specie.

**H**erbarum prima divisio ex omnium ferè Botanicorum consensu sumenda est à parte organica una vel pluribus principalibus quæ plerisque generibus conceduntur, nonnullis defunt.

Partes Plantarum organicæ principales sunt *Radix*, *Caulis*, *Folia*, *Flos*, *Fructus*. Ex his quoniam, *Radix* nullis deest, *Folia* paucissimis, *Caulis* quibus deesse videtur *Folia* ejus vicem supplent, ut in *Capillaribus* dictis videmus, *flores* & *fructus* proferentia: restant *Flos* & *Fructus*, quorum alterutro aut utroque quæ carent *Herbæ Imperfectæ* haberi solent, reliquæ *Perfectæ*.

Hanc ego viam insistens, *Florem*, *Fructumque* pluribus partibus consistere animadvertens, *Florem* nimirum undequaquæ perfectum *Perianthio*, *petalis*, *staminibus cum suis apicibus* & *stilo*, è quibus *petala* & *stamina cum apicibus* ad integritatem Floris spectant, *Perianthium* ad tutelam; *Fructum* ex semine & pericarpio; *Herbas perfectas* divisi in eas quæ flore essent imperfecto, hoc est, apetalò stamineo, & quæ perfecto, hoc est, tum staminibus tum petalis donato, quamvis ex his nonnullæ perianthio carerent. Deinde eas quæ *Florem* haberent perfectum, respectu Fructuum distinxi in eas quæ pro fructu semen haberent nudum, seu nullo præter perianthium vasculo testum aut exceptum, quæque semen pericarpio aliquo aut vasculo à perianthio diverso inclusum aut exceptum; quæ omnium perfectissimæ videntur.

Hoc modo *Herbas* omnes in quatuor *Genera* distribui, nimirum in

1. Eas quæ *Flore* & *Fructu* simul, vel solo *Flore* carent, quas *Imperfectas* Botanici vocant. Hujus Generis sunt *Fungi*, *Musci*, *Fuci*. Aquis perpetuò immersæ, *Ophioglossum*, *Kali geniculatum*, & siquæ sunt similes.

2. Eas quæ *Florem* habent imperfectum seu stamineum.

3. Eas quæ *Florem* habent petalodem seu bracteatum, verum semen pericarpio destitutum seu nudum.

4. Eas quæ tum *Florem petalodem*, tum *semen pericarpio* seu vasculo inclusum aut exceptum obtinent.

Neque



Neque hujus Distinctionis me adhuc pœnitet: Duas tamen, ne quid dissimulem, in ea difficultates experior. Primam in distinguendo Florem *apetalon* seu stamineum à *petalode* seu bracteato: Secundam in distinguendo semen nudum, à *pericarpio* seu vasculo *incluso* aut excepto.

Quod ad primam attinet, liceat mihi hîc repetere, quæ de ea \* alibi dixi. Cùm pleræque plantæ florem obtineant calice & petalis donatum, nonnullæ alterutra harum partium destitutum, utramque enim non habent; De *priore* Genere non est cur simus solliciti, sive Calix ejusve partes florum petala colore, textura & fugacitate imitentur, ut in *Ranunculo*, *Sinapi*, &c. sive etiam stabilitate & duratione, ut in *Semprevivo* *majori*, *Telephio*, &c. Calix enim à petalis situ exteriori, & usu, ad Florem scilicet continendum vel sustinendum, abundè distinguitur.

\* In Epistola ad Rivinum.

De *posteriore*, illis nempe quarum Flos alterutra harum partium caret, quæstio est, quænam sit illa quâ careat, quàmvis habeat, calixne an petalon. Cui ut responderi possit, oportet ut hæ partes rectè definiantur, sive ut ostendatur in quibus differat *petalon* à *calice*. *Petalon* ergo à *calice* textura & constitutione teneriore delicatioræque, colore insigni, quodque fugax & minùs durabile sit, adeoque vasculi sive involucri usum fructui nunquam præstet, satis videtur distingui. Atque has floris notas esse, omnes qui de Floribus scribunt & loquuntur, vulgùsquè ipsum agnoscit. Unde *Flores* illi, quorum partes stamina ambientes texturâ, consistentiâ & colore herbaceo sunt, aut ad fructûs usque maturitatem perdurant, petalis carere censendi sunt, & proinde *Apetalis stamineis* denominandi: illi autem quorum partes prædictæ textura & colore diverso sunt, aut decidunt, marcescuntve ante seminis maturitatem, calice destitui, adeoque nudi dicendi. Hinc *Persicaria*, *Fegopyri*, *Bistortæ* partes illæ quæ figurâ & colore florum petala simulant, cùm ad fructûs usque maturitatem durent, adde & ei pro vasculo seu involucrio inserviant, *Perianthium* potiùs ejusve partes quàm petala habendæ sunt.

Dices, calicem & petala stabilitate & duratione non rectè distingui, cùm petala in nonnullis, teipso etiam fatente, nec marcescant, nec defluant ante seminis maturitatem, ut v. g. *Semprevivo* *majori*, *Telephio*, &c. Respondeo, Non opus esse ut de his sollicitus sim quæ utramque partem, ni-



mirum calicem & petala, obtinent. in his enim situs & officium, ut dixi, has partes satis discriminant; in illis autem quæ alterutra harum partium carent, illa quam obtinent unde melius determinari potest quænam sit, quam à similitudine quam habet vel cum calice in aliis herbis vel cum foliis floris, quæ & sunt & ab omnibus habentur fugacia & colorata.

Dices, in eò certius distinguui calicem à petalis, quòd calix fructui vasculi seu involucri usum præstet, petala autem minimè. Respondeo, hoc ad stabilitatem calicis consequi, unde & ipse etiam illud pro nota secundaria admisi *Hist. p. 16. & p. 154.* Calix autem sive vasculi seminalis usum præbeat, sive minus, perinde esse mihi videtur, modò ad fructus maturitatem usque duret. Cum autem hanc solum floris staminei notam fecerit *D. Tournefort*, quòd in illo pars controversa, hoc est, de qua ambigitur calixne an petal-  
lon sit, capsula seu involucrum semini eidem succedenti evadat, miror cur *Camabi*, *Lupulo*, *Spinachia*, *Urtica*, *Mercuriali* florem stamineum tribuerit, cum dicta pars in illis involucrum feminis nunquam fiat, nullum enim in universum earum floribus semen succedit. Cur etiam *Fraxino* & *Arbori Iudæ* florem stamineum adscripserit, cum earum semina aliud præter calicem vasculum seu pericarpium habeant?

Dices, cum adeò difficile sit florem stamineum definire, annon melius foret hanc distinctionem prorsus ablegare, & flores omnes petalodes facere, alios, calice donatos, alios, quibus staminei accensendi sunt, nudos. Respondeo, minimè: Cum Frumentaceorum glumas, quæ textura, colore, & duratione cum reliquo culmo conveniunt, florum petala facere, cuilibet etiam ex Agricolarum vulgo ridiculum foret, quos si de Frumentaceorum flore, & florendi tempore interrogas, de apicibus & tempore quo ii exferuntur tibi respondebunt: cumque hinc sequeretur *Aquilegiam*, *Narcissum*, *Polygonatum*, &c. cum *Mercuriali*, *Atriplice*, *Blito*, Plantis diversissimis jungendas, quod valde absurdum & incongruum esset.

Pergo jam ad secundam difficultatem, quæ est de distinguendo semen nudum, à pericarpio seu vasculo incluso aut excepto: quam sic breviter expedio, Me scilicet pro seminibus nudis habere quæcunque in toto genere per maturitatem singulatum à matribus sponte separantur & abscedunt.

Hinc

Hinc *Umbelliferarum*, *Verticillatarum*, *Asperifoliarum*, *Poly-  
spermæ*, nobis dictarum semina pro nudis habeo.

In toto Genere dixi, ut *siliculosarum* nonnullarum, & *Legu-  
minosarum* monospermæ semina excludam, quorum conce-  
ptacula non aperiuntur sed unâ cum feminibus inclusis de-  
cidunt; nec tamen propterea totum id quod abscedit semen  
nudum censendum est; quia Plantæ ipsæ manifestè con-  
generes sunt stirpibus quarum pleraquæ species vascu-  
la habent vel multis feminibus foeta, vel sponte se aperi-  
entia & semen effundentia. His etiam *Malvam* accensui, quia  
semina ejus unâ cum cortice, quamvis laxè adhærente à  
planta matre hoc modo sponte separantur & abscedunt;  
quamvis non nescirem *Cesalpinum* aliòsque eum secutos  
*Malvam* semina vasculis inclusa proferre affirmare. Ut-  
unque Methodi meæ nihil interest, sive nuda habeantur ejus  
semina sive minus. Si enim vasculo seu pericarpio inclusa  
esse pertendis, facilè ad *Alceas Indicas* Lib. 19. cap. 9. tradi-  
tas transferri possunt.

Siquis verò hanc notam seminis nudi non admittat, aliam  
si potest commodiorem substituatur; nam plantas nonnullas  
semina nuda proferre non ut opinor negabit: Dicat ergo,  
obtestor, & me doceat quâ certâ notâ semen nudum à recto  
discernere queam.

Seminum conceptacula in Plantis Animalium viviparo-  
rum uteris, Sèmina ipsa fœtibus secundis inclusis responde-  
re sagacissimi *D. Malpighii* observatio est, & quidem verissi-  
ma. Sicut ergo in Animalibus prædictis quod dehiscit &  
fœtum expellit uterus est, quod ejicitur, fœtus cum suis  
involucris: Sic in Plantis quod adhuc adhæret & dehiscens  
semen effundit, utero respondet, quod excidit unâ cum te-  
gumentis suis, fœtui exposito. Non tamen ut in Animalibus  
sic etiam in Plantis omnibus uteri adhærent, & dehiscences  
semina effundunt, sed in nonnullis v. g. *Pomiferis* & *Bacci-  
feris* *Bardana* min. aliisque uteri ipsi feminibus fœti à matri-  
bus abscedunt & decidunt. Quinimo in plantis omnibus  
quamvis conceptacula seminum feminibus effusis aliquandiu  
adhærescant, brevi tamen marcescunt & corrumpuntur,  
sunt enim partes temporaneæ, & in eo ab Animalium uteris  
diversæ quod semel tantum facunda sint & semina pari-  
ant, feminibusque editis contabescant; cum Animalium  
uteri per multos annos durent, & multoties fœtibus conti-  
nendis & fovendis inserviant. Quicquid erant, plura semina  
( b \* 2 ) continet.

continet, quamvis sponte à matre abscedat & decidat, ne unquam ex se aperiatur aut dehiscat & semina exponat, pro utero seu conceptaculo habendum est. Item quicquid singula semina continet paritèrque unà cum feminibus decedit, si sit ex Genere Plantarum quarum pleræque species semina plura singulis vasculis inclusa obtinent; aut si singula, ea exponunt.

Sed ut unde digressus sum redeam, Cum Herbas initio hoc modo in quatuor Genera distinxissem, posteriora duo ob multitudinem specierum quas sub se continebant, in alia adhuc inferiora seu subalterna necessariò subdividenda esse deprehendi. Cùmque Botánicos hujus seculi peritiores plantarum differentias à flore aut fructu sumendas esse consentire viderem, Primò à Fructuum differentiis eas dividere conatus sum. Differentiæ autem Fructuum præcipuæ vel in eorundem figura, vel in numero cellularum in quas pericarpium dividitur, consistunt. Verùm statim agnovi, Fructuum figuram nullas ferè notas Genericas certas & constantes subministrare: at nec cellularum numerum rem expedire, cùm in iis quæ ejusdem manifestè Generis sunt, ut v. g. *Tetrapetalis siliquosis* & *Papilionaceo flore* præditis in *Cisto*, *Hyperico*, *Medio*, &c. Fructus hoc respectu plurimum differre observentur; ut in Præfatione ad *Syllogen stirpium Europæarum extra Britannias nascentium* ostendi.

Cùm hæc non successit, alià aggressus sum viâ, nimirum à Florum differentiis, eas dividere. Hæ aut sumi possunt vel à figura Floris, vel à petalorum quibus constat numero. A petalorum numero Differentias quæ ad Genera determinanda sufficiant sumi non posse ex iis quæ contra *D. Rivini* Methodum objeci constare existimo. Quibus addere possem, in Genere *Limonii* cujus Flos aliàs pentapetalos est *Tournefortium* duas species observasse, flore monopetalo præditas, v. g. *Limonium Hispanicum frutescens*, *Portulaca marine folio*, & *Limonium Hispanicum multifido folio*, quamvis alias horum flores exactè similes viderentur aliarum istius Generis specierum floribus. In eadem etiam specie dari flores interdum tetrapetalos, interdum hexapetalos, v. g. in *Balsamina fœmina*, observante *Tournefortio*. Balsamines, autem Cucumerinæ species alias monopetalas esse, alias pentapetalas, alias hexapetalas adnotavit Clarissimus *Horti Malabarici* Autor. Quin & *Tournefortius* Balsamines cucumerinæ vulgaris flos an monopetalos sit, an verò pentapetalos difficile esse determinare

determinare fatetur. *Balsamina* autem *famina* species alias flore dipetalo esse, alias tripetalo, alias tetrapetalo, alias hexapetalo scribit jam laudatus *Horti Malabarici* Autor. At neque à Floris forma notæ Generum indices peti possunt: siquidem quæ Floris figurâ conveniunt Genere differunt ut in *Hyacintho stellato Boraginis flore*, &c. ostendi, & vice versa quæ floris figurâ differunt, Genere conveniunt, ut in *Bulbosis* patet, quarum aliæ florem habent *regularem*, aliæ *irregularem*; aliæ florem *Liliacum*, aliæ *Stellarem*, aliæ *Urceolarem*, &c.

Cùm ergo Herbas Bulbosas quæ ab omnibus Congeneres habentur, & revera sunt, siquidem in multis convenient & sibi invicem similes sint, v. g. radice tunicata ex una sede fibras emittente, flore hexapetalo aut certè in sex laciniâs ad margines secto; vasculis seminalibus in terna loculamentâ divisâ; Foliis ad Graminea tum texturâ suâ tum figurâ accidentibus, ad margines non incisâ; Cùm (inquam) Herbas hæc neutri methodo, seu quæ à Floris forma sumitur, seu quæ à Petalorum numero obsequi aut adaptari posse viderem, sed in utralibet à se invicem separandas esse, & ad diversâ Genera reducendas: Ex iis enim aliæ flore monopetalo sunt, aliæ hexapetalo; aliæ regulari, aliæ irregulari, &c. Cùmque animadverterem eas in multis cum Graminibus & cognatis convenire, v. g. *Foliorum texturâ figurâque*, ut quæ plerunque absque pediculis à basi latiore in longum producta essent, fibrisque constarent rectis non ramolis, per longitudinem extensis, marginisque haberent æquales, h. e. nec laciniatos, neque crenatos aliôve modo manifestè incisos; caulibus plerunque simplicibus seu non ramosis; plantula denique seminali non bifolia foliis anomalis; sed uno duntaxat folio, interdum etiam pluribus eisque succedentibus similibus constante, & è terra emergente. Cùm (inquam) hæc animadverterem, *Bulbosas* usque affines, cum *Graminibus* & *Graminifoliis* Genere convenire, & ab aliis quibuscunque Herbis facie externa, totoque habitu, textura etiam & constitutione differre agnovi, proinde ab illis separandas & unâ tradendas censui. Qua in sententia magnopere confirmabar autoritate & exemplo Celeberrimorum Botanicorum *Matthiæ Lobelii* & *utriusque Bauhini*, qui convenientiam hanc inter Herbas Bulbosas & Gramina in caulium simplicitate & foliorum figura animadverterunt, & tanti fecerunt, ut in Historiis suis pro-



ximum post Gramina Bulbosis locum dederint, quamvis præcipuam convenientiæ notam vel nesciverunt vel neglexerunt, nimirum plantulæ feminalis similitudinem & germinandi modum.

Plantas ergo omnes flore qualicunque seu petalode, seu stamineo, manifesto & nudis oculis visibili præditas à plantula feminali distinxì in eas quarum plantula feminalis vel bifolia esset, vel binis lobis seu cotyledonibus instructa, quamvis eas prima germinatione foliorum specie suprà terram non efferret; & eas quarum plantula feminalis nulla ejusmodi folia seu lobos haberet, sed foliis succedentibus similibus vel unico quod frequentissimum, vel pluribus, quod rarum, prædita esset; quod à semine sato apparet.

Quomodo utrumque Genus in alia subalterna divisi sæpius exposui, nimirum in Tabula generali tum Methodo, tum Historiæ Plantarum præfixa, inque Epistola ad *D. Rivinum*, proinde non opus est ut hìc repetam: præsertim cum Methodum meam emendatam, additis notis Generum caracteristicis, brevi emitte decreverim.

De quarto duntaxat Genere superius posito, hoc est, de Herbis flore perfecto seu petalode, vasculiferis pauca superaddam.

Has selectis imprimis *Pomiferis*, *Bacciferis* & *Multisiliquis*, à numero petalorum in flore distinxì in 1. *Monopetalas*, 2. *Tetrapetalas*, 3. *Pentapetalas* & *Polypetalas*. *Monopetalas* & *Tetrapetalas* subdivisi in *Flore Uniformi* & *Difformi*, (ut cum *Joach. Jungio*, primo, quantum noverim, hujus distinctionis autore loquar) donatas.

Quod ad *Monopetalas* attinet, earum Genera, seu quæ flore sunt *Uniformi*, seu quæ *Difformi*, in paucis præterquam Floris quæ dixi accidentibus conveniunt, ut congeneres dici vix mereantur.

In Genere *Tetrapetalarum Uniformium Tetrapetalæ siliquosæ* & *siliculosæ* dictæ inter se quidem omnes valde similes sunt, & multis notis conveniunt, ut Flores habere plures simul in caulis & ramorum summitatibus successivè se aperientes, nullis ad pediculorum exortum foliolis appositis, Folia in caulis alterno aut nullo ordine posita, calices florum cum petalis plerunque deciduos: ideoque ejusdem manifestè Generis sunt. Reliquas quia nulla fere in re præterquam petalorum numero inter se conveniant, Herbas flore *Tetrapetalo uniformi* anomalas denominavi.

Tetra-



Tetrapetalis flore difformi seu *Papilionaceo* donatis, monopetalæ nonnullæ ob floris formam aliâsque partes similes conjungendæ sunt, & ob hanc similitudinem hoc Genus rectius *Herbæ flore Papilionaceo præditæ* dicendum est, ejûsque character à floris potiùs figura quàm petalorum numero sumendus est.

Pentapetalarum Generi Herbulas quasdam tetrapetalas ob similitudinem & conformitatem in plerisque partibus cum *Alfinis*, subjeci, quod alicui fortasse absurdum videri possit: verùm ego convenientiam plantarum in tota facie & habitu pluris facio quàm eam quæ in eodem petalorum numero consistit; proinde plantas hæcæ ob differentiam hanc solam ab *Alfinis* non separandas judico; longè enim absurdius esse mihi videtur eas ob solam in petalorum numero convenientiam alienis & dissimilibus admiscere, quàm neglecto characterè cum iis copulare quibuscum in aliis plerisque conveniunt.

Deinde Herbas quas voco pentapetaloïdes, à Floribus in quinque lacinias totidem petala imitantes ad unguem usque divisas, Pentapetalis genuinis annumero; nec Methodi multum interesse puto ut separentur, proinde nec Morisonum reprehensioni obnoxium quòd eas pro pentapetalis habuerit.

*Defensio notarum Generum characteristarum  
quas D. Tournefort rejiciendas censet.*

**S**uccedit proximo in loco, ut notas nostras Generum characteristicas, quas *Tournefortius* carpit & reprehendit, vel ut superfluas & inutiles rejiciendas censet, defendi vel excusari posse ostendam.

Verùm antequam de singulis dicam, pauca in Genere præmittam, quæ plerisque notis defendendis sufficiant.

Primò, Secundùm regulas Logicæ rerum Genera dividenda sunt & Species constituendæ per Differentias essentialis. Verùm cum Essentialiæ rerum nobis incognitæ sunt Accidentia quædam propria, quæ soli alicui Generi, omnibûsque sub eo contentis speciebus conveniant, pro illius differentia seu nota essentiali sumenda sunt. Deinde cum non

dantur ejusmodi Proprietates, vel nobis saltem non innotescunt, pro Differentia sumenda est collectio tot Accidentium, omnibus istius Generis speciebus communium, quot in alio quocunque Genere non possunt simul omnia inveniri. Quod à nobis in multis generibus factum est.

Secundò, Notæ à me adhibitæ ad Genera constituenda, quas *Tournefortius* eo nomine rejicit, quòd in posterum inveniri possint species quibus non convenient, si omnibus huc usque cognitis speciebus congruant, pro Characteristicis tantisper inservire poterint, donec species illæ quibus non convenient ab ipso, vel ab aliis detegantur. Tum autem notis illis incongruis addi potest hæc limitatio, plurimum vel plerumque.

Tertiò, notis Characteristicis necessariis alias interdum ad Genus determinandum non necessarias ex abundanti adjeci, ad facilitandam scil. Generum cognitionem, & ut studiosis Descriptionum loco sint.

Quartò, Notæ hæc quamvis non necessariae, obviæ tamen & manifestæ cum sint, earum etiam multæ omni tempore quo plantæ vigent occurrunt; Utilitatem suam habent, ut scilicet Plantæ primo aspectu agnoscantur, atque etiam extra florendi tempus.

His in genere præmissis ad singularia descendo.

P. 67. Primò reprehendit, quòd *Mandragora* notam fecerim, nullos caules producere præter pediculos flores & fructus [solitarios] sustinentes, cum fieri possit, ut in posterum inveniat *Mandragora caulescens, foliis laciniatis, radice fibrosa*. Verùm cum nota hæc omnibus huc usque cognitis, & solis [è *Bacciferarum* Genere] *Mandragora* speciebus conveniat, non est cur eam rejicam, metu nè in posterum detegatur *Mandragora* species cui non conveniat. Tantisper certè pro nota characteristica inservire poterit, donec occurrat *Mandragora* species caulescens. Quin & contra D. *Tournefortii* notas objicere possum, Fieri posse ut aliquando inveniantur *Mandragora* species flore polypetalo: nam in hac ipsa Classe datur planta, nimirum *Momordica*, cujus flores nunc in quinque lacinias dissecti sunt, nunc in quinque petala divisi. Dicit fortasse, si detur ejusmodi in Methodo nostra ad aliud Genus pertinebit. Cur ergo *Momordicam* ad aliud genus non refert? Respondere etiam possum, & in mea, si occurrat Planta baccifera caulescens, &c. eam ad aliud genus referri posse. Sed, ut quod res est dicam, Plantarum

rum species à toto vultu & habitu potius determinandæ sunt, quàm ab unâ quacunque parte sola. Unde & *Tournefortius* ipse aliquoties coactus est *le port peculiere* pro characteristica assumere: nonnunquam etiam pro alicujus *Classis* Genere admittere cui nota *Classis* ejus, non convenit. Sic v. g. *P. 111. Echium*, cujus florem non esse absolutè regularem fatetur, non tamen propterea rescindendum esse à *Classis* secundæ *Sectione* Quarta concedit, quamvis *Classis* illius titulus sit *Herbæ flore monopetalo regulari*, &c. Sic *P. 79. Periplocam* ad *Classis* primæ sectionem quartam reducit, quamvis absolutè loquendo eam inter *Herbas Classis* secundæ, quæ flore sunt *Stellato*, collocandam esse fateatur.

Quocirca, quod alibi dixi hic iterum inculco, nullam posse excogitari methodum naturæ analogam, quæ anomalias aliquas non admittat; ut in *Methodo Tournefortiana*, quam omnium absolutissimam censet, ex exemplis allatis apparet.

Quod ad reliquas *Mandragoræ* notas quas rejicit, nimirum *radices grandes & quodammodo anthropomorphas habere*, attinet, eis non inlisto, & ex abundanti addidi, ne notas aded famosas ignorasse aut penitus rejecisse arguerer.

Idem & in multis aliis feci notis scilicet Generum characteristicis & discretivis alias non necessarias adjeeci; vel quòd, ut dixi, obviæ & manifestæ omnibus essent; vel quòd omni tempore occurrerent, & Stirpi dignoscendæ inservirent, cum nec flos nec fructus appareret. vel ut Lectorem erudirem, & celebrem aliquem plantæ usum vel in cibo, vel in medicina, vel in mechanicis, noxiâve aut deleteriam qualitatem docerem.

*P. 69. Lili convallium* notas. illas, quòd *caules nudos* habeat, & *baccas rubras* rejici posse existimat; neque (inquit) dubitare quisquam debet, plantam aliquam nominare *Lilium convallium* caule folioso & fructu nigro, si ejusmodi in posterum offerretur.

His vel excusandis vel etiam defendendis eadem Apologia, idémque responsum quod pro *Mandragoræ* notis adhibui sufficere potest.

*P. 70. Notæ illæ Polygonati*, quas rejiciendas censet, quòd scil. *maius sit* [quàm *Lilium convallium*] quòdque *caulis pluribus foliis vestiatur*, eodem modo defendi vel excusari possunt, quo præcedentium notæ.

Quod

Quod autem dicit, Floris formam differentiam satis notabilem constituere inter *Sigillum Solomonis* & *Lilium convallium*, minimè verum est, cum *Polygonatum latifolium ramosum* sive quartum Clusii flores producat *Lilii convallium* floribus per similes, *Clusio* & *Jo. Bauhino* testibus; nec tamen hanc speciem excludit à Genere *Polygonati*.

P. 71. Notam illam Rusci & Lauri Alexandrinæ, nimirum quòd ἐμπυλλόχρητοι sint, rejiciendum demonstrat, quoniam datur species Lauri Alexandrinæ quæ ejusmodi non sit, v.g. *Laurus Alexandrina ramosa fructu è summitate caulium prodeunte* H. R. P.

Cui respondeo, Notam hanc adeo insignem esse, & huic Generi peculiarem, ut in ejus charactere sileri & omitti non debuerit, quamvis unam pateretur exceptionem; quod me non latuit.

Sed nè eadem multoties repetere cogar, Eodem quo supradictæ modo defendi possunt Sequentium Generum notæ, quas ut non necessarias aut essentielles rejiciendas aut omittendas censet D. Tournefortius.

P. 74. Tithymali, *Lac reddere*; quam tamen omnibus, Tithymali speciebus hætenus cognitis convenire concedit, quàmque non multò post *Apocyni*, quæ solà ab *Alepiade* distinguatur, notam facit.

P. 78. Notam illam *Apocyni folia in caulibus bina opposita habere* rejicit, séque non dubitaturum ait dicere, *Apocynum foliis alternatim nascentibus*. At ego magni facio foliorum in caule situm; & ejusdem generis plantas foliorum situ variare rarum est, ut ejusmodi situs nota characteristica meritò habeatur. Cur autem in me reprehendit quod ipse facit? nimirum *Gratiolam* à *Digitali* Genere distinctam statui posse concedit, quia foliorum situ adverso ab eo differt. *Helianthemum* notam facit folia in caule opposita, quæ à *Telephio legi- vimo* Imperati distinguatur. *Harmalam* ab *Hyperico*, *Corchorum* à *Fabagine* foliis alternis distinguit. *Bifolium* ab *Orehide* & *Helleborine* foliis adversis.

Dicet fortasse, His Generibus hanc notam ideo addi, quia à flore aut fructu sumptæ vel non suppetunt, vel non sufficiunt ad hæc Genera distinguenda. Respondeo, si ad hæc distinguenda prosint, non video cur ad alia citius & facilius discernenda non conducant; ideoque utiles saltem sint si non necessariae.

P. 85. *Bryoniae albæ*, *Caules non spinosi, folia Virginea, vis anthartica*; Quæ notæ simul sumptæ nulli alii hujus Classis Generi



Generi conveniunt; hujus autem omnibus huc usq; cognitis speciebus.

P. 89. Cucurbitæ, *Flos albus*; Verùm cùm in aliis *Pomiferis* color floris ferè semper flavus sit, nota hæc non videtur contemnenda. Ipse etiam solo floris colore duo Genera *Chrysanthemi* & *Leucanthemi* distinguit.

P. 91. Campanulæ, *Lætescere, multaque habere semina lucida rufescentia*. Lac reddere omnibus, quod sciam, hujus speciebus convenit; semina lucida & ruffa habere notam generalem esse non aulim asserere, plerisq; tamen speciebus convenit.

P. 92. Rubiæ tinctorum, *radicis color ruber*. Cùm nomen plantæ hinc inditum sit; & usûs ad tingendum notissimi, satis causæ habui cur ejus mentionem facerem.

P. 96. Gentianæ, *sapor amarus, folia nervosa, bina in caule adversa*. At ego eodem, ut puto, jure saporem amarum *Gentianæ* notam facere possum, quo ille saporem acrem *Sinapeos* & *Eruce* characteristicam fecit: Præsertim cùm radix *Gentianæ* ob amarorem insignis sit, & ab hac qualitate vires ejus præcipuæ dependant.

P. 97. Nicotianæ, *folia in caule alterna*; Hâc nota cum *Hyoscyamo* convenit & à *Gentiana* distinguitur. Ego autem situm foliorum in caule notam insignem esse, & multi usûs in plantarum generibus distinguendis existimo, quiquid ille contradicat.

P. 98. Hyoscyami, *Vis narcotica & virosa, calix floris in quatuor partes sectus, folia alterna*. Calix floris revera in quinque acuta segmenta dividitur, ut & in notis meis invenio. Error hic cùm nimis festinarem, minùs attento & incogitanti excidit. Omnes autem hæ notæ simul sumptæ nulli alii hujus Classis Generi conveniunt.

P. 99. Pervinæ, *Caules graciles, folia polita, Hederaceorum colore & consistentia*. Cùm paucissimis herbis hujusmodi folia concedantur, eorundem color & textura notis hujus characteristicis non immeritò adjiciuntur.

P. 100. Auriculæ ursi, *folia crassa & lævia*. Objicit *Tournefortius* *Saniculam Alpinam* foliis *Boraginis* villosam C. B. Respondeo, Plantam hanc veram & genuinam *Auriculæ ursi* speciem non esse. Vide *Parkinsonum in Parad.*

P. 101. *Primulæ veris, Caulis nudus, Folia rugosa, textura rarioris*. Objicit autem contra caules nudos, species aliquot *Primulæ* in *Catalogo Horti Lugduno-Batavi* descriptas quæ fo-

lia



lia habent inter flores. Cui respondeo, Species illas non esse naturâ distinctas & stables, sed tantum luxuriantis naturæ lusus, seu varietates accidentales ex semine Primulæ in hortis satò enatas, non ex semine propagandas.

P. 102. Centaurii minoris, *Sapor amarus*. Vide Gentianam.

P. 108. Valerianæ, *Caulis concavus foliis ex adverso binis cinctus*. Has ante nos pro Valerianæ notis proposuit Cæsalpinus.

P. 109. Valerianellæ, *Caulis dichotomus*. Cum hujusmodi caulem habere omnibus & solis (quod hætenus noverim) Valerianellæ speciebus conveniat, non video cur non pro nota Generis characteristica assumi possit. præsertim cum Tournefortius nullas adferat notas toti Generi communes.

P. 111. Buglossi, *Foliorum lacinia rotunda cum in Boragine acutæ sint*. Ego D. Jungio hanc notam debeo, & Boraginem à Buglossò eâ rectè distingui adhuc pertendo.

P. 119. Anagallidis, *folia in caulibus & ramulis ex adverso binâ, Flores ex singulis foliorum alis singuli exeuntes & pediculis oblongis gracilibus insidentes*. Hæ notæ unâ cum aliis allatis simul sumptæ solis & omnibus Anagallidis speciebus conveniunt; quod mihi sufficit.

P. 123. Verbasci, *Folia alterna, Flores in caulibus & ramulis verticaliter siti*. Eadem Apologia pro his, quæ pro præcedentis plantæ notis sufficit. Posterior autem nota insignis est, nec ita multis plantis convenit, ut observari mereatur.

P. 128. Cyclamini, *caules præter pediculos flores singulares sustinentes nulli, radices rotundæ*. Pro his pariter idem quod pro præcedentium plantarum notis ἀπολογῶμαι. Paucae autem plantæ sunt quæ non alios habent caules quàm florum pediculos, præsertim seorsim è radice prodeuntes.

P. 142. Euphrasie, *folia venosa, semina albicantia*. Hæ notæ mihi non rejiciendæ videntur, cum ei cum Cratægogino Euphrosynes faciæ, quæ à Botanicis Euphrasie meritò accensetur, communes sint.

P. 144. Orobanches, *Folia minimè viridia aut herbacea in caule*. Quamvis notæ quæ à floribus & fructu sumuntur sufficiant ad hanc ab Orchide distinguendam; adeò tamen insignis nota in ejus characterè non debuit omitti.

P. 152. Lamii, *Folia urtica, odor fætusus, calices expansi, unde semina crassiuscula per maturitatem illico decidunt*. Hæ notæ defendi utcumque possunt cum plantis plerisque omnibus

nibus & folis quæ à Botanicis Lamii & Urticæ etiam mortuæ, ob foliorum similitudinem, titulis insigniuntur, conveniant; mihi autem propositum fuit quàm minimum innovare, & nomina confundere, Lectoremque in Botanicis minùs exercitatum turbare. Folia autem Urticæ adeò insignia sunt ut herbæ hæ vulgo nostro Anglico etiam idiomate *Dead-nettles* dicantur.

P. 155. Cardiacæ, *folia subrotunda circumscriptione & profundè incisa*. Hanc notam minimè rejiciendam esse contendendo, quòd soli huic generi inter verticillatas, quod hætenus noverim, conveniat. interim tamen non rejicio notam, quam adfert *Tournefortius* à floris figura.

P. 160. Sideritidis, *Odor Lamii, folia tamen Urticæ dissimilia; facultas vulnera à ferro infecta sanandi*. Has notas Sideritidis posui, ut sub hoc titulo herbas omnes Sideritides dictas complecterer, non quòd eas Philosophicas esse putarem.

P. 161. Marrubii, *totius plantæ canities; odor vehemens & gravis; folia obtusa, crenata, rugosa, &c.* Notæ hæ sufficiunt ad plantæ Genus determinandum & ab aliis distinguendum. Interim tamen non rejicio notas à floris figura sumptas, & siquis illis acquiescere & contentus esse velit, per me licet. Notari tamen meretur, quòd non tantùm in *Marrubio albo vulgari* sed & in *Hispanico caliculatorum striatorum* margines in totidem spinulas quot sunt in singulis striæ dividantur.

P. 164. Rorismarini, *Magnitudo & statura insignis, Flores ad caulium nodos foliis intermixti, Folia angusta, prona parte candida, supina obscurè viridia*. De his notis idem dicendum quod de notis Marrubii.

P. 165. Verbenæ, *Folia rugosa profundè dissecta, Flores in spicas longas digesti*. Soli Verbenæ vulgari conveniunt hæ notæ: Si ergo dentur aliæ species quæ character aliquo communi & Generico cum vulgari Verbena conveniunt, foliis non rugosis neque dissectis Floribus in spicas non digestis, deleantur per me licet notæ hæ earumque loco communes illæ & essentielles substituantur.

P. 169. Hyssopi, *Flores unum latus spectantes*. Nota isthæc Hyssopo vulgari convenit, si dentur aliæ species quibus non conveniat, me volente expungatur.

P. 171. Nepetæ, *Folia Urticæ incana, odor Menthæ validior*. Notæ hæ obviæ & manifestæ sunt unicuique herbam aspicienti

enti & tractanti, ideoque si omnibus Nepetæ speciebus conveniant, minimè rejiciendæ.

P. 172. *Betonicæ, Caules non ramosi, folia crenata cum longis pediculis.* Cum notæ hæ omnibus & folis *Betonicæ* speciebus hætenus cognitis conveniant, pro characteristicis habendas & retinendas censeo.

*Ibid.* *Ocimi, Folia Amaraci, odor suavis Citri vel Caryophylli, Flores in spicas laxas è verticillis rarioribus compositas digesti.* Notas à figura floris sumptas certiores esse & his præferendas agnosco. Sufficiunt tamen hæ ad plantæ Genus determinandum, aut ut ita dicam characterizandum. Botanici enim & Hortulani *Ocimum* bene nôrant antequam floris figura à quoquam descripta aut fortè animadversa esset; unde autem nisi ex notis quas assignavi aut ejusmodi aliis? Complexus certè accidentium qui in nullo alio Genere inveniri potest, pro cuiuscunque characteristica inservire potest.

P. 174. *Chamædryos, Folia habere Quercinorum figurâ & divisurâ.* Hæc nota à nominis Etymo desumitur, & *Chamædryi* vulgari convenit, quam ego à *Teucrio* Genere distinctam feci.

P. 175. *Polii, Folia oblonga, canescentia, crenata.* Hæ notæ omnibus *Polii* speciebus quas ego pro genuinis & legitimis habui conveniunt. Si dentur præterea aliæ herbæ eadem cum *Polio* florum figurâ & dispositione, quibus hæ notæ non conveniunt; pro *Polii* speciebus iis admittendas agnosco qui à sola florum figura, situ, aliisve accidentibus notas Generum characteristicas desumendas censent.

P. 177. *Chamæpityos, Folia Pini, odor resinæ.* Has notas nominis Etymon suppeditat, *Chamæpityi* autem vulgari conveniunt, quæ reliquorum norma esse debet.

*Ibid.* *Bugulæ, Dulci generum caules habere.* Hanc notam omnibus *Bugulæ* speciebus communem non esse monui, sed vulgari speciei peculiarem: Cur ergo, inquires, ejus mentionem fecisti in *Bugulæ* characterè; Respondeo, quia nota est insignis & singularis, nec scio an alii cuiquam *Verticillatæ* herbæ conveniens.

P. 180. *Glasti, Folia habere ad tingendum utilia.* Cur in characterè hujus plantæ hanc notam omitterem rationem non video, est enim insignis, nec ulli alii hujus Classis Generi, quantum noverim, conveniens.

P. 184. *Cochleariæ, Statura humilis, folia subrotunda, crassa, succulenta, locus maritimus.* Notæ hæ si omnibus *Cochleariæ*

# DE VARIIS PLANTARUM METHODIS. 31

leariæ speciebus convenient & unà cum reliquis in nullo alio hujus classis genere simul inveniantur, pro caractere sufficiunt. Dices, Folia in omnibus subrotunda non esse. Respondeo, Quæ è radice exeunt ad rotundam figuram accedunt. Dices, in montibus procul à mari locis palustribus & aquosis Cochleariam sponte ortam inveniri. Agnosco. Pro locis maritimis ergo substitue aquosis. Si fructûs figura sufficeret ad hoc Genus determinandum, quod mihi non videtur, omitti possent hæ notæ. Verùm *Lepidium Glastifolium*, & *Raphanum rusticum* huc reduci mihi incongruum videtur.

P. 190. *Hesperidis, Flores speciosi, semina majora.* Speciebus præcipuis, quibus primariò *κατ' ἑξοχὴν* hoc nomen tribuitur, hæ notæ conveniunt, quod sufficit ad excusandam earum mentionem in hoc loco; Iis tamen addi potest aliqua limitatio vel exceptio.

P. 194. *Erysimi, Siliquæ longiores & graciliores*, quibus ab *Eruca* differt. Concedo libenter *Eruca* notam à sapore peculiari & odore fœtido potius desumendam esse, & ipse etiam odorem fœtidum pro nota adhibui.

P. 195. *Rapæ Radicem habere dulcem.* Scribit *Tournefortius*, sibi non necessarium videri saporem respicere in hoc Genus plantis. Cur non, quæso, in iis quæ hominibus in cibo usus adeò frequentis sunt? Ipse etiam in *Sinapi* & *Eruca* saporem ut notam distinctionis respiciendam esse agnoscit. Objicies, inter me & *Morisonum* de sapore *Rapæ* non convenire, cùm ego dulcem esse affirmem, ille calidam & acrem esse plantam scripserit. Respondeo, Ille de planta tota, ego de radice sola loquor quæ an acris & calida sit ad coquos provoco, qui apud nos illam sale & pipere condire solent.

P. 199. *Potamogitonis, Folia integra seu non incisa ad margines, alternatim in caulibus sita, nisi ubi spicæ exeunt, ubi bina ex adverso.* Cùm notæ hæ omnibus *Potamogitonis* genuinis speciebus convenient, ad hoc genus ab aliis discriminandum conducunt, & ad complendum ejus characterem suum usum habent.

P. 202. *Amaranti, coma speciosa & immarcescibilis.* Notæ adeò insignis, & omnium oculos incurrens, unde & plantæ nomen in hujus generis caractere omitti non debuit, quamvis notæ à flore & vasculo seminali desumptæ ad illud determinandum sufficerent. Verùm in definitione Floris  
staminei



staminei mihi cum *D. Tournefort* non convenit. Blitum in-  
super hortenſe minus Herbariis dictum ſaltem Planta illa  
quam ego pro eo habui & \* deſcripti, vaſcula &  
ſemina Amaranti habuit. Clariffimus etiam \**liſt.* p. 200.  
Vir *Paulus Hermannus* Blito hortenſi minori tam rubro,  
quàm albo capſulam oblongam tunicum ſemen continentem,  
perque maturitatem horizontaliter diſſilientem attribuit.

P. 204. *Papaveris*, *Capita in plures cellulas intus diviſa*, *Petala ampla, tenuia, fugacia*, *succus lacteus aut flavus acer, vis narcotica*. Pro his notis eadem Apologia ſufficit, quam pro *Potamogitonis* adhibui.

P. 210. *Alſines*, *Folia in caulibus bina oppoſita*. Hanc notam rejicit *Tournefortius*, quia *Spergula*, quam pro *Alſines* ſpecie admitto, folia eo modo ſita non habet; ſed plura ad ſingulos nodos ſtellarim diſpoſita. Cui Reſpondeo, ut in *Hiſtoria*, Quamvis Folia caulium nodos ſtellarim ambire videantur, curioſius tamen rimanti duo plerunque folia apparebunt ad ſingula genicula, quibus vel reliqua adnec-  
tuntur vel ex eorum ſinubus exeunt.

P. 222. *Hyperici*, *Flores flavi, ſtaminibus multis, Coma attritu ſanguineum ſuccum reddens*. Poſtremam notam omnibus hujus Generis ſpeciebus non convenire concedo, ideòque ei addi poſteſt in pleriſque ſpeciebus, omitti tamen non debet, quia ſingularis, & ab omnibus ſerè Botaniciſ memorata. Reliquæ notæ eodem modo defendi poſſunt quo præcedentium multæ. Cur autem mihi non liceat notis *Hyperici* colorem floris flavum addere, cùm ipſe *Tournefortius* duo Genera *Chryſanthemi* & *Leucanthemi* non aliter quàm barbularum colore flavo & albo diſtinguat.

P. 223. *Pyrolæ*, *Radices fibroſæ, folia per hyemem retinere*. Notis hiſce ab *Orchidibus* differt, à quibus etiam flore & fructu diſtinguitur, nota tamen adeò ſingularis, nec aliis hujus generis conceſſa omitti non debuit.

P. 224. *Rutæ*, *Odor gravis & vehemens, folia ad Umbellatarum accedentia, colore glauco*. Quamvis notæ à Floris & Fructûs ſtructura ſumptæ ſufficiant fortasſe ad hoc Genus ab aliis omnibus diſcriminandum; eæ tamen quas addidimus utiles ſunt ad clariorem Plantæ & uberioſorem demonſtrationem & notitiam, etiam extra florendi tempus.

P. 225. *Nigellæ*, *Folia minutim inciſa, Flores & fructus grandes pro plantæ magnitudine*. Cùm hæ notæ omnibus *Nigellæ* ſpeciebus conveniant, ſintque ſingulares & valdè obſervabiles;



fervabiles; non est cur Plantæ characterem non ingredi-  
antur.

P. 236. Hellebori nigri, *Radices catharticae, Folia digitata, Flores non decidui, &c.* Pro his idem quod pro præcedentis plantæ notis dictum esto. Verùm pro florum petalis non habeo folia illa lata speciosa concava, quæ diu durant, sed cornicula illa tubulosa quæ stamina & capitulum velut coronâ cingunt, & citò decidunt.

P. 238. Pæoniæ, *Flores rosei maximi, semina majuscula rotunda, radices crassæ vel tuberosæ, Folia composita.* Pro his notis defendendis eadem apologia sufficit quæ pro præcedentium multis.

P. 240. Anemones & Pulsatillæ, *Unicum in uno caule florem gestare.* Hæc nota omnibus hætenus cognitis Anemones & Pulsatillæ speciebus convenit, ideoque pro characteristica inservire poterit, donec *Tournefortius* contrarium exemplum produxerit; quod puto nunquam faciet.

P. 242. Ranunculi, *Calicem unâ cum flore decidere.* Hanc notam rejicit *Tournefortius*, & affirmat dari Ranunculi species flore nudo, aliâsq; quarum calix unâ cum flore non decidat. Verùm plantas nonnullas pro Ranunculi speciebus habet quas nos ab ejus nominis participatione excludimus, nimirum *Anemonem nemorum, Florem Adonidis Hepaticum trifolium Chelidonium minus, Plantaginem aquaticam.*

P. 245. Caryophyllatæ, *Folia pinnata, radix aromatica.* Pro his idem quod pro Rutæ notis defendendis sufficit. De radice tamen an in omnibus speciebus aromatica sit dubito, addatur ergo in speciebus notioribus.

P. 246. Fragariæ, *Folia venosa, flagella reptatrix, Fructus odorati.* Hæ notæ insignes sunt & manifestæ, nec multis plantis communes, ideoque retinendas censeo. Fragariam autem sterilem à vesca Genere distinctam facio, cum utriusque plures dentur species, & pulpa esculenta cui semina innascuntur pro nota Generica sufficiat. Folia hujusmodi venosa huic generi ferè peculiaris sunt.

P. 250. Circææ, *Fructus echinati deorsum reflexi.* Pro hac nota idem quod pro præcedentium multis dictum esto, posse eam pro characteristica inservire tantisper donec *D. Tournefort* contrarium exemplum objecerit.

P. 256. Cari, *Radix dulcis esculenta.* Hanc notam ideo adjeci, quia non omnibus innotescit; quòdque Cari notæ  
(c\*) non

non aded claræ sint, quin pluribus indigeat ad Genus certò determinandum & ab aliis distinguendum.

P. 262. *Oenantes, Radices tuberosæ, in aquosis & palustribus nasci.* Cur non inservire possint pro characteristica hujus Generis radices tuberosæ, æquè ac *Sisari* ac *Bulbocastani*? Species autem omnes mihi hucusque cognitæ in palustribus & aquosis nascuntur.

P. 264. *Cerefolii, Radix amia, folia ad Petroselinum accedentia.* Hæ notæ Chærephyllo sativo cujus alias species nondum novimus, conveniunt. Reliquas plantas quas sub hoc nomine comprehendit *Tournefortius*, nos Genere diversas facimus.

P. 265. *Smyrni, Semina per maturitatem nigra.* Cùm hæc nota ad hujus plantæ cognitionem conducatur, non video cur rejici debeat.

P. 266. *Coriandri, Folia inferiora latiora, superiora [in caule] tenuius incisa.* Hanc notam ad hujus Generis cognitionem & ab aliis distinctionem, non necessariam esse fateor; conducit tamen ad plantam cognoscendam antequam fructus appareat; ut & odor teter & ingratus cimum, unde ei nomen, *Coriandrum* sativum intellige.

P. 270. *Sphondylium, Floris color albus* huic à *Pastinaca latifolia*, & *Panace Heracleo* distinguendo inservit.

P. 271. *Seminum color per maturitatem niger.* *Ferula* vulgarissimæ convenit, eique ab aliis umbelliferis semine foliaceo distinguendæ utilis est. *Medullæ fungosæ* usus ad ignem concipiendum aded celebris olim fuit, & adhuc est, ut in hujus Characterem non debuerit omitti.

P. 272. *Thapsiæ, Folia habere minutim incisa.* Omnibus speciebus non convenire concedo, sed plerisque tantum; ideoque expungatur.

P. 276. *Cachryos, Folia habere minutim incisa.* Notam necessariam non esse ad hanc à reliquis distinguendam fateor, non est tamen inutilis ad pleniorē ejus cognitionem, etiam antequam fructus appareat, ideoque retineri potest.

P. 283. *Lini, Semina melina, Flores caduci.* Notam priorem non ut generalem proposui, sed plerisque *Lini* speciebus convenientem. Posterior, cum genuinis *Lini* speciebus omnibus, quantum noverim, conveniat, quid nocet ejus meminisse?

P. 285. *Caules nudi ramosi, & in palustribus maritimis nasci.* *Limonii* speciebus omnibus hætenus cognitis conveniunt, iisque qui plantas maritimas indagant utiles sunt ad hoc genus dignoscendum.

P. 289. Colchicum, Quodd major planta sit, quodque *folia lata Liliacea* obtineat, à Croco differt. Notæ hæc obviæ sunt; & unicuique facilè observabiles, omnibûsque Colchici speciebus communes; ideoque retineri possunt. Quas D. Tournefort adfert potiores esse non abnuerim, verùm minus manifestæ sunt & observatu difficiliores.

*Ibid.* Croci, *Folia habere oblonga, graminea, lineâ albâ media secundum longitudinem dividente.* Eodem modo defendi potest hæc nota quo præcedentium plurimæ.

P. 294. Aloës, *Flos hexapetalos.* Tournefortius sibi monopetalon semper visum esse ait. Ego persæpe Florem monopetalon in plures lacinias totidem petalâ referentes ad unguem ferè divisum polypetalon cum vulgo appello, nec curiosè distinguo. Reliquas notas quas rejiciendas censet, mihi, & fortasse aliis, utiles videntur ad certiore & plenior plantæ cognitionem.

P. 300. Tulipæ, *Caules foliosi cum singulis in singulis floribus.* Tulipam caulem habere aliquot folijs cinctum nemo potest negare: Hoc autem respectu Herbas bulbosas distingui, quod aliæ caules nudos habeant, aliæ foliosos, certum est, cur ergo hujus Accidentis in ejus charactere mentio non fiat, rationem non video. Singulos autem flores in singulis caulibus habere, omnibus Tulipæ genuinis speciebus naturâ convenire existimo.

Florem habere versicolorem & pulcherrimè variegatum non convenit omnibus hujus Generis speciebus; Fortasse etiam hæc colorum varietas culturæ & mangonio debetur. At vero aptum esse tot coloribus variare, iisque tam pulchris & speciosis, huic Generi peculiare est.

P. 303. Ornithogali, *Radix alba, stamina florum lata.* Notæ priori non insisto; Posteriores D. Jungio debeo, & singularem esse in hujus flore notam, maximèque characteristicam judico; nec alias plantas hoc nomine donandas esse cui hæc nota non conveniat.

P. 309. Glycyrrhizæ notæ quas rejicit eodem modo defendi possunt quo præcedentium plurimæ. Siquidem *radices habere dulces luteas repentes, soli inter legumina Glycyrrhizæ convenit.*

P. 312. Fabæ, *Caules concavi, siliqua erecta.* Quod sæpius dixi hic repeto, cum notæ hæc omnibus Fabæ hactenus cognitæ speciebus communes sint; cumq; Legumina non scandentia

scandentia, filiquarum sitûs respectu distingui soleant in filiquis rectis & propendentibus donata; non video cur hujus sitûs mentio in Fabæ caractere fieri non possit, ut sciatur ad quod Genus pertineat.

P. 316. Viciæ, *Folia minimè Glauca seu castia, Pisi & Lathyri ad instar.* Hoc non obstat, quòd minùs incana aut argentea esse possint. Nam glaucus ille color, qui in Piso & Lathyro cernitur, cærulei aliquid admixtum habet: vox autem illa *viridiora* expungi potest.

P. 335. Resedæ, *Capsulam habere in tres cellulas divisam.* Ego Resedæ capsulam in tres carinas etiam antequam semen maturescit dehiscere animadverto, quarum unaquæque duos seminum ordines continet: initio tamen conjunguntur & vasculum efficiunt, in tres cellulas, quantum ego discernere possum, divisum.

P. 338. *Folia circumscriptione subrotunda, laciniata* pro Aconiti notis habeo, nec immeritò, quia Aconitis omnibus conveniunt hætenus cognitæ, nec opus est ut eas mutem donec Tournefortius Aconitum illud Plantaginis folio inveniat & ostendat.

Somniat autem, cum me differentiam inter Aconitum & Delphinium in eo sitam dicere affirmat, quod in Genere Delphini folia tenuiùs incisa sint quàm in Aconiti; cum ego nullam inter has plantas hoc respectu distinctionem instituerim, sed folia duntaxat in Delphinio minutissimè dissecta esse dixerim.

Quamvis Morisonum secutus Aconiti nomen Ranunculo glabro tribuerim, ab Aconito tamen genuino Genere distinctum feci. Cum autem Morisonus à vasculi feminalis præcipuè & seminum differentiis notas Generum characteristicas sumpsisset non erat cur Ille in Generibus constituendis Floris rationem haberet.

P. 340. *Folia Umbelliferarum modo divisa, flores penduli, semina nigra lucida* Aquilegiæ nobis notæ sunt, quas rejiciendas censet; quæ cum omnibus Aquilegiis conveniant, & unicuique obviæ & manifestæ sint, nec sciam an alii cuivis Plantæ Generi omnes simul concedantur, mihi retinendæ videntur.

P. 341. Idem dicendum de notis Fraxinellæ, quas reprehendit & rejicit, nimirum quòd habeat *Folia Fraxini*, unde & nomen obtinuit, *Flores in spica speciosos, semina nigra, splendentia.*



P. 351. Cinaræ, *Ungues squammarum calicis carnosæ elculenti ut & Floris fundus*. De his idem dicendum quod de præcedentium multis, quòd omnibus hætenus cognitis Cinaræ speciebus conveniant, ideòque tantisper retineri possunt donec *Tournefortius* Cinaram produxerit unguibus squammarum amaris aliùsve ingrati saporis.

Conjecturam illam de Centaurio Cinaræ folio rejiciat per me licet, si rationes idoneas habet, ego ei faciliè assentior.

P. 359. Caçaliæ, *Folia habere subrotunda*. Cui notæ defendendæ eadem Apologia sufficit quâ pro Cinaræ & aliarum notis sæpissimè usus sum.

P. 362. Senecionis, *Folia habere dissecta*. Hæc nota omnibus, quas equidem noverim, Senecionis speciebus convenit: quidni ergo in societatem characteristicæ assumatur.

P. 371. Idem dicendum de *Dipsaci* caulium spinis.

P. 373. De *Scorzonera foliis longis, glabris, nervosis* idem dictum esto.

P. 387. Jacobææ, *Folia laciniata, flores lutei, radiati*. Cùm planta hæc foliis laciniatis à *Conyza*, *Astere Virga aurea*, aliisque Papposis non lactescentibus flore radiato differat, à Senecione autem flore nudo, non video cur hæ notæ rejiciendæ sint: nè dicam nomen Anglicum *Ragwort* huic notæ suffragari. Adversatur *Conyza helenitis* dicta, *foliis laciniatis*, ut in *Historia* monui; quæ quidem ob folia laciniata Jacobæis annumeranda videtur, quamvis laciniarum figurâ longa & acuminata ab eisdem fatis differat. *Tournefortius* eam ad *Asterem* refert, nec dubitare se ait eam *Asterem palustrem laciniatum luteum* appellare.

Cæterùm ego Jacobææ notam *Tournefortianam* à floribus calice propemodum cylindrico in plura segmenta ad basin usque fisso, sumptam non improbo aut rejiciò, & ipse aliquando eâ uti cogitaveram: verùm cùm viderem necesse mihi esse, si id facerem, plurimùm innovare & nomina confundere deterritus à proposito sum. Verùm *Tournefortius* audacior est, nec veretur Virgam auream majorem, vel *Doriam C. B. Conyzam palustrem serratifoliam ejusdem*, & *Solidaginem Saracenicam* ad Jacobæam referre.

P. 388. *Tussilaginis*, *Folia subrotunda, subtus incana, flores in singulis pediculis singuli*. Cùm prima nota adeò insignis sit, ut ob folii figuram in plerisque linguis Planta *Ungulæ caballinæ* nomen obtinuerit; & tomenti pronæ foliorum parti adnascens usus sit pro fomite ad ignem concipiendum;

cúmque flore in singulis caulibus singulari à *Petaſite* differat, qui flores multos simul velut in thyſo producit; optimo jure, me judice, notæ hæ characterem ejus ingrediuntur.

P. 390. Floris Africani, *Folia Tanaceti ſimilia*. Hanc notam ideo adjeci, quia nonnulli Botanici plantam ipſam ab hac foliorum ſimilitudine *Tanacetum Africanum* denominarunt.

P. 391. Floris Solis, *Flores omnium maximi*. Planta illa, cui initio hoc nomen inditum eſt, flores habuit maximos: ſi dentur aliæ floribus minoribus maximis illis ſtrutura ſimilibus, illarum gratia per me licet nota characteriſtica mutetur: in caractere tamen hujus Generis mentio aliqua hujus notæ fieri debet. Vel hæ ab illis magnitudine florum diſtingui & in duo Genera dividi poſſunt.

P. 394. Matricariæ, *Florum barbulae albæ diſcum medium luteum ambientes*. Diverſitas coloris in hujus & congenere barbulis & Diſco medio inſignis nota eſt, nec debuit omitti, quamvis huic peculiaris non ſit. Diſpoſitio autem florum in quandam Umbellæ ſpeciem, eam ab aliis quarum flores diſcum medium luteum, radium album obtinent, ſatis diſtinguit.

P. 395. Chamæmeli, *Flores ſparſi, barbulis albis diſcum medium luteum cingentibus*. Floribus ſparſis à Matricaria diſtinguitur: verum cum notæ hæ aliis communes ſint, ut Bellidæ majori & minori, quin omittantur non repugno.

P. 397. Millefolii, *Barbulae floris medio diſco concolores*. Quicquid repugnat *Tourneſortius* ego hanc notam utiliſſimam judico ad Herbas corymbiferas floribus radiatis alias ab aliis diſtinguendas.

P. 402. Afari, *Folia Hederaceis ſimilia*. Similitudo hæc in conſiſtentia & colore, potiùs quàm in figura foliorum conſiſtit: quamvis vix credo *Tourneſortium Afarum anguſto & oblongo folio* unquam inventurum eſſe.

P. 407. Bliti hortenſis, *Vaſcula per maturitatem in duas partes horizontaliter diſſiliencia*. Quod ſe nunquam obſervare potuiſſe ſcribit *Tourneſortius*. Verum *P. Hermannus* quoad minorem ſpeciem mecum conſentit. De majore mihi nondum ſatiſfactum fateor.

P. 408. Alchimillæ, *Floſculi in inſummis caulibus umbellatim congeſti, octo foliis herbaceis compoſiti, vaſculis ſeminalibus ſingulis bina ſemina continentibus inſidentes*. *Tourneſortius* qui *Percepier & Knewell* Alchimillæ ſpecies facit, non ſine cauſa probabili

probabili has notas rejicit. Ego qui has tres Plantas pro Genere diversis habeo, nec immerito, ut ostendam in Methodo brevi edenda; eas retinendas contendo.

P. 422. Ricini, *caudicem habere lignosum, fructus echinatos in Racemos dispositos.* Hæ notæ Ricino Europæo præcipuè conveniunt. Si dentur stirpes Indicæ & exoticæ his notis carentes, quod mihi nondum compertum est, omitti aut mutari possunt. Non tamen arbores omnes fructu tricocco pro Ricini speciebus habendæ sunt, nisi & aliæ notæ concurrant, nimirum Flores à Fructu remoti, &c.

P. 427. Cannabis, *Folia digitata, ex adverso binæ, Cortices ad funes & linteamina texenda idonei.* Notæ hæ cum insignes sint, & seorsim singulæ paucis, binæ simul nulli, quod sciam plantæ conveniant, cur quæso pro characteristicis admitteri non debent?

P. 428. Lupuli, *Fructus squammosi, in racemos laxos congesti, ob amarorem ad cerevisiam condiendam utiles, Caules volubiles.* Cum notæ hæ omnibus & solis inter Herbas floribus stamineis Lupulis conveniant, ad illos à congeneribus distinguendos tantisper inservire poterint, donec Tournesfortius Lupulum caule recto, cerevisiam corrumpentem produxerit. Deinde aptitudinem ad condiendam cerevisiam reliquis notis addidi, non quod necessariam existimarem ad Genus determinandum, sed ex abundanti, ut Lectorem in pleniorē & certiorē Plantæ notitiam deducerem. Cur autem in me reprehendit quod ipse facit, siquidem Classis decimæ quintæ Sectionis tertiæ notam generalem constituit semina proferre pani conficiendo idonea.

Tournesfortii autem notæ omni Lupulo non conveniunt, neque enim omnes Lupuli flores, neque omnes fructus, nec ulli omnino flores & fructus simul producant. Quomodo ergo Lupuli nota Generica esse potest quod omni Lupulo non convenit: aut unde scire possum Lupulum marem & fœminam eandem seu Genere seu Specie plantam esse, nisi quod caulium figura & motu, Foliorum figura & situ conveniant.

Tandem me reprehendit. Quoddam florem hexaphyllon *Lappatho*, quadrifolium *Fegopyro*, *Persicaria*, *Saxifragæ aureæ* adscripserim, quibus inter Herbas flore stamineo donatas locum dederim.

Cui respondeo, Id non per errorem aut incogitantiam à me factum, ut alibi dixi, sed ut receptæ opinioni, quæ in id Genus herbis calicem pro flore habet sermonem accommodare,

darem, quòdque calicis segmenta in earum nonnullis florum petala simularent, ut aliquando dubitaverim, an flores staminei essent necne. Deinde calix floris pars est, ejusque lacinia, ubi alia non adsunt, lato sensu floris folia dici possunt, Petali autem nomen, quòd Floris foliis proprium feci nunquam illis tribui.

Quamvis autem hæc, aliæque quæ omitto, utcumque defendi aut excusari possunt, nonnulla tamen sunt quæ non immeritò notat, in quibus me errasse non diffiteor, partim alios nimis securè secutus, partim memoriâ lapsus, partim etiam per incuriam aut festinationem. ut v. g.

1. Quòd *Convolvuli* notam Genericam fecerim, fructum habere in terna loculamenta, quorum singulis bina insunt semina, divisum. In quo *Morisonum* secutus sum, cujus Autoritati tum nimium tribui.

2. Quòd *Asclepiadi* siliquas singulares singulis floribus succedentes tribuerim, quo ab Apocyno differre statuerim, cujus floribus binæ succedunt; cum revera hoc respectu ab Apocyno non differat, sed binas pariter producat siliquas. Errorem hunc unde hauserim non recordor; puto tamen me alicui Autori eum debere.

3. Quòd *Agrimoniae* florem hexapetalon tribuerim, cum revera pentapetalos sit: qui error festinanti calamo cum minus attenderem excidit: nam in manuscripta mea descriptione florem pentapetalon ei assignatum invenio.

4. Quòd *Vitidis* fructum seu capsulam pro semine habuerim; cujus erroris antea à D. Rivino admonitus sum, qui *Vitidis* fructum revera capsulam esse, quatuor semina continentem, è Cæsalpino hausit.

5. Quòd *Pimpinellæ* florem tetrapetalon adscripserim, cum ille semper monopetalon observaverit. In quo tamen an erraverim necne, an florem in quatuor lacinias totidem folia imitantes ad unguem usque divisum tetrapetalon sciens appellaverim nescio; non multum Botanices interesse existimans ut hujusmodi flores curiosè distinguantur. Idem de Saxifragæ aureæ flore dictum esto.

Alia adhuc sunt in quibus me erroris insinuat an rectè nondum scio, quæ quamprimum occasio dabitur diligenter examinabo. Errorem enim sive ab amicis, sive ab extraneis admonitus, cum de eo planè constiterit, libens agnosco & emendo: nec mihi met aliter satisfacere possum. Lectoribus meis & ipsi etiam veritati injurius essem, ni id facerem.

Ceterum



Cæterum Fons & origo severioris censuræ quam in notas nostras exercet *D. Tournefort* est præjudicata opinio, quòd notæ Generum characteristicae non aliunde sumi possint aut debeant quam à Florum & Fructuum similitudine, in iis plantis quæ has partes habent. Hoc enim sufficere ut Plantæ congeneres dicantur si florè & fructu convenient; quamvis alia quacunque parte à se invicem differant; ut in *Ranunculis* videre est, quorum alii folia habent circumscriptione subrotunda, alii longa & graminea, alii integra, alii tenuiter laciniata; Alii radicibus sunt fibrosis, alii tuberosis aut grumosis; omnes tamen quia florè fructuq; convenient, *Ranunculi* genuini habentur & sunt; proinde notas à reliquis partibus sumptas inutiles & rejiciendas esse, quia salvo Genere adesse & abesse possunt.

Concedo equidem convenientiam omnimodam in *Florè Fructuq;* simul, haud dubiam notam esse convenientiæ Genericæ. Verùm notas Generum characteristicas aliunde quàm à figura Floris sola ejusve petalorum numero sumi posse superius ostendi: à quacung; autem parte sumantur perinde esse, modo omnibus & solis alicujus Generis speciebus convenient.

At nec Floris formam ejusve petalorum numerum sufficere ad Genus determinandum, si cætera non respondeant; posse enim Genere differre quæ floris figura aut petalorum numero conveniunt, & vice versa Genere convenire, quæ in his differunt. Certissima enim convenientiæ Genericæ nota est, plura Attributa habere communia.

At neque Tournefortius ipse ad Florem & Fructum solum se limitat aut restringit in Generum characteristicis constituendis; sed libertatem sibi reservat tertiam aliquam partem, ejusve modum aut qualitatem in societatem characteris adsciscendi, cum sola Florum autem Fructuum similitudo non sufficit ad Genera clarè distinguenda. Hinc duos Generum ordines constituit. *Primum* eorum in quibus similis florum & fructuum structura duntaxat ratio habeatur. *Secundum* eorum in quorum characterem præter Florem & Fructum aliquid magis peculiare admittitur, cujuscunque tandem naturæ id sit. Notas ergo sumit vel

1. A radice, à qua in hac tunicata, in illo squamosa *Tulipam* à *Lilio* distinguit: à radice tuberosa *Bulbocastanum* à reliquis Umbelliferis.

2. A foliorum situ ad eandem costam adverso *Pentaphyllo* à *Pentaphyllo* cujus folia in eodem pediculo flabelli in formam

formam disposita sunt: ab eodem in eorundem pediculo numero, ternario in hac, quinario aut septenario in illo, *Fragariam* à *Pentaphyllo* discriminat. A foliorum situ adverso in caule *Gratiolam* à *Digitali*, cujus folia alternatim disponuntur, Genere diversam statui non abnuat. *Telephii legiti* Imper. Folia in caule alterna notam facit qua ab *Heli-anthemum* distinguatur cui bina adversa. Sic *Harmalam* ab *Hyperico*, *Corchorum* à *Fabagine* foliis alternis distinguit. *Bis-folium* ab *Orchide* & *Helleborine* foliis adversis. A foliorum etiam dispositione *Pinus Abietis* & *Laricis* differentias sumit. *Abies* enim folia profert singularia, ramulos undique cingentia; *Pinus* bina ex eadem theca seu tubulo membranaceo prodeuntia; *Larix* plura simul secundum ramos, ad intervalla agminatim velut in penecillos coaggesta. *Chamamelis* notam constituit folia habere laciniata, aut valde tenuiter incisa. *Nasturtii* folia profundè incisa, quo species ejus à *Thlaspeos* speciebus distinguuntur. *Matricariæ* Folia in lacinias oppositas velut per paria ad medium usq; costam incisa, & per margines iterum secta. *Brassicæ* folia crassa, glauca, per margines plerunq; undata.

At nec *caulium* differentias rejiciendas esse ait, neq; ipsorum *corticum*. Nec enim *Dens leonis* aliter ab *Hieracio* differt quam caule fistuloso simplici: nec *Suber* ab *Ilice* quam cortice crasso, levi.

*Calyces* insuper florum magni persæpe usûs sunt. *Scorzonera* enim calice squamoso à *Tragopogone*, cui simplex est, differt. *Pseudo-dittamnus* calice in infundibulum expanso à liquis *Verticillatis* differt.

At nec *Succus plantarum* in aliquibus casibus negligendus est. Cum præcipua differentia inter *Apocynum* & *Vincetoxicum* in eo consistat, quòd illud lac manat, hoc minimè. Unde credo Plantam illam quam *Stapelius Fritillariam crassam Promontorii bonæ spei* nuncupat, *Vincetoxici* speciebus annumerari debere.

Quin & *coloris* florum in nonnullis plantis ratio habenda est: siquidem *Chrysanthemum* & *Leucanthemum* non aliter quam florum colore differunt. Calicis splendor species *Elichrysi* à *Gnaphalii* speciebus distinguit.

*Odor* & *Sapor* ipse nonnullarum stirpium differentiam inter secundi ordinis genera constituit. Sic *Sinapi* & *Eruca* sapore peculiari non tantum à se invicem verum etiam à multis aliis plantis quarum flores & fructus ejusdem formæ sunt, distinguuntur.

Contra

Contra notas hæc idem obijcere possum quod *Tournefortius* contra multas è meis, quòd scil. salvo Genere abesse, aut etiam contrariæ inesse possint. Sic v. g. Si occurreret aliqua planta Floris Fructusque structurâ, colore, situ cum *Chamamelo* conveniens, eodémque prorsus odore & sapore, quamvis folia haberet rariùs incisa, aut etiam non incisa omnino, non vererem illam *Chamamelum* appellare. Idem mutatis mutandis de *Matricaria* dici possit. Quin quod ad *Nasturtium* attinet, non tantùm possibile est, ut in posterum inveniat, sed revera jam actu existit, & frequens in hortis colitur *Nasturtii* species foliis integris, nec omnino incisis, nulla alia in re à vulgatissimo *Nasturtio* hortenfi diversa. Sic si offerretur planta aliqua insipida & inodora, modo figura & situ floris fructusque, reliquisque partibus præcipuis cum *Eruca* conveniret, non dubitarem illam *Eruca* nomine insignire. quemadmodum *Absinthium* insipidum & inodorum non ideo ex *Absinthii* Genere excludendum est, quòd sapore & odore careat.

Deinde, Hæc Genera quæ notis à foliis reliquisve partibus sumptis à se mutuo distinguunt, vel floris fructusque structurâ conveniunt, vel eisdem differunt. Si convenire statuis, cur ea distinguunt, magis quàm *Ranunculi* species quæ pariter foliis & radicibus differunt?

Si dicas, Te ideo hæc Genera distinguere, quòd communis usus distinguat. Contra, Non oportet Philosophum vulgi errores sequi, sed potius eos emendare. Deinde, Quamvis alicubi scrupulosus esse videtur *Tournefortius* nè Genera recepta rejiciat, aut nomina immutet; alibi tamen nomina recepta & in medicorum scriptis valde frequentata, plantis quibus imponuntur ad diversa Genera translatis audacter eliminat & de possessione sua deturbat. Sic *Rhaphanum rusticum Cochleariæ*, *Hederum terrestrem Calaminthæ* speciem facit. Quod si Genera hæc flore fructusque differre statuis, ab eorum differentiis notæ Genericæ petendæ sunt, non ab aliis partibus.

Dicit *Tournefortius*, non affectandam esse nimiam *analogiam* in notis caracteristicis, nec nimis rigorosè examinandas convenientias seu similitudines quæ sunt inter plantas ejusdem Generis: unde se non invitum admittere in participationem alicujus Generis species nonnullas, non obstantibus differentiis aliquibus nonnisi acutissimis oculis discernendis. Sic *Trifolium pratense purpureum*, quia notas omnes essentielles ge-  
nuini

formam disposita sunt: ab eodem in eorundem pediculo numero, ternario in hac, quinario aut septenario in illo, *Fragariam* à *Pentaphyllo* discriminat. A foliorum situ adverso in caule *Gratiolam* à *Digitali*, cujus folia alternatim disponuntur, Genere diversam statui non abnuat. *Telephii legitimi* Imper. Folia in caule alterna notam facit qua ab *Heli-anthemmo* distinguatur cui bina adversa. Sic *Harmalam* ab *Hyperico*, *Corchorum* à *Fabagine* foliis alternis distinguit. *Bifolium* ab *Orchide* & *Helleborine* foliis adversis. A foliorum etiam dispositione *Pinus Abietis* & *Laricis* differentias sumit. *Abies* enim folia profert singularia, ramulos undique cingentia; *Pinus* bina ex eadem theca seu tubulo membranaceo prodeuntia; *Larix* plura simul secundum ramos, ad intervalla agminatim velut in penecillos coaggesta. *Chamamelis* notam constituit folia habere laciniata, aut valde tenuiter incisa. *Nasturtii* folia profundè incisa, quo species ejus à *Thlaspeos* speciebus distinguuntur. *Matricariæ* Folia in lacinias oppositas velut per paria ad medium usq; costam incisa, &, per margines iterum secta. *Brassicæ* folia crassa, glauca, per margines plerunq; undata.

At nec *caulium* differentias rejiciendas esse ait, neq; ipsorum *corticum*. Nec enim *Dens leonis* aliter ab *Hieracio* differt quàm caule fistuloso simplici: nec *Suber* ab *Ilice* quàm cortice crasso, levi.

*Calycea* insuper florum magni persæpe usûs sunt. *Scorzonera* enim calice squamoso à *Tragopogone*, cui simplex est, differt. *Pseudo-dittamnus* calice in infundibulum expanso à liquis *Verticillatis* differt.

At nec *Succus plantarum* in aliquibus casibus negligendus est. Cum præcipua differentia inter *Apocynum* & *Vincetoxicum* in eo consistat, quòd illud lac manat, hoc minimè. Unde credo Plantam illam quam *Stapelius Fritillariam crassam Promontorii bonæ spei* nuncupat, *Vincetoxici* speciebus annumerari debere.

Quin & *coloris* florum in nonnullis plantis ratio habenda est: siquidem *Chrysanthemum* & *Leucanthemum* non aliter quam florum colore differunt. Calicis splendor species *Elichrysi* à *Gnaphalii* speciebus distinguit.

*Odor* & *Sapor* ipse nonnullarum stirpium differentiam inter secundi ordinis genera constituit. Sic *Sinapi* & *Eruca* sapore peculiari non tantum à se invicem verum etiam à multis aliis plantis quarum flores & fructus ejusdem formæ sunt, distinguuntur.

Contra



Contra notas hæc idem obijcere possum quod *Tournefortius* contra multas è meis, quòd scil. salvo Genere abesse, aut etiam contrariæ inesse possint. Sic v. g. Si occurreret aliqua planta Floris Fructusque structurâ, colore, situ cum *Chamamelo* conveniens, eodémque prorsus odore & sapore, quamvis folia haberet rariùs incisa, aut etiam non incisa omnino, non vereretur illam *Chamamelum* appellare. Idem mutatis mutandis de *Matricaria* dici possit. Quin quod ad *Nasturtium* attinet, non tantùm possibile est, ut in posterum inveniatur, sed revera jam actu existit, & frequens in hortis colitur *Nasturtii* species foliis integris, nec omnino incisis, nulla alia in re à vulgatissimo *Nasturtio* hortenfi diversa. Sic si offerretur planta aliqua insipida & inodora, modo figura & situ floris fructusque, reliquisque partibus præcipuis cum *Eruca* conveniret, non dubitarem illam *Eruca* nomine insignire. quemadmodum *Absinthium* insipidum & inodorum non ideo ex *Absinthii* Genere excludendum est, quòd sapore & odore careat.

Deinde, Hæc Genera quæ notis à foliis reliquisve partibus sumptis à se mutuo distinguis, vel floris fructusque structurâ conveniunt, vel eisdem differunt. Si convenire statuis, cur ea distinguis, magis quàm *Ranunculi* species quæ pariter foliis & radicibus differunt?

Si dicas, Te ideo hæc Genera distinguere, quòd communis usus distinguat. Contra, Non oportet Philosophum vulgi errores sequi, sed potius eos emendare. Deinde, Quamvis alicubi scrupulosus esse videtur *Tournefortius* nè Genera recepta rejiciat, aut nomina immutet; alibi tamen nomina recepta & in medicorum scriptis valdè frequentata, plantis quibus imponuntur ad diversa Genera translatis audacter eliminat & de possessione sua deturbat. Sic *Rhaphanum rusticum* *Cochlearia*, *Hederum terrestrem* *Calamintha* speciem facit. Quod si Genera hæc flore fructusque differre statuis, ab eorum differentiis notæ Genericæ petendæ sunt, non ab aliis partibus.

Dicit *Tournefortius*, non affectandam esse nimiam *analogiam* in notis characteristicis, nec nimis rigorosè examinandas convenientias seu similitudines quæ sunt inter plantas ejusdem Generis: unde se non invitum admittere in participationem alicujus Generis species nonnullas, non obstantibus differentiis aliquibus nonnisi acutissimis oculis discernendis. Sic *Trifolium pratense purpureum*, quia notas omnes essentielles ge-  
nuini

nuini Trifolii habet, nisi quòd ejus Flos, qui aliter ejusdem formæ externæ seu apparentis est cum Floribus cæterarum specierum, monopetalos sit, non ad normam reliquorum è quatuor foliis compositus, à Trifolii Genere ob hanc diverſitatem non excludendam cenſet, quia differentia illa non eſt ſenſibilis niſi illis ſolis qui plantas earumque partes curioſè rimantur & diſſecant. Sic *Limonii* character eſt, Florem habere pentapetalon; nihilominus duas ſe in *Hiſpania* ſpecies inveniffe, nimirum *Limonium Hiſpanicum fruteſcens Portulacæ marinæ folio*, & *Limon. Hiſpan. multifido folio*, quorum flores revera monopetali ſunt, quamvis prorfus ſimiles eſſe videantur aliarum ſpecierum floribus. Sic *Linaria* flores riſtum ſeu os repræſentant duobus velut labiis conniventibus clauſum. Verùm *Linaria Bellidis folio* C. B. & *Linaria Luſitanica villoſa*, *Bellidis folio ampliore*, quam in *Portugallia* invenit, flores habent tubuloſos utraque extremitate apertos. Sic *Lychnidis* vasculum ſeminale in plerisque ſpeciebus ſimplici intus cavitare eſt, nec in cellulas diviſa: ſpecies tamen illa quam C. *Bauhinus* *Lychnidem viſcoſam purpuream latifoliam levem* vocat, capſulam tripartitam obtinet. In his & ſimilibus caſibus (inquit) præſtare videtur ſenſui aliquid concedere, & ſtructuræ apparenti florum & fructuum adhærere, quàm nimiam *analogiam* affectare.

Alibi, inquit, Plantas nonnullas interdum inveniri quæ ad plura Genera accedunt. Has iis accenſebimus quas majori partium numero referunt. Hinc plantam illam, quam C. B. *Nafurtium Alpinum inſipidum* vocat, *Heſperidis* ſpeciebus annumerare oportet, quia ad Genus iſtud foliis, floribus ſiliquis appropinquat; cum propriè loquendo *Nafurtium* flore duntaxat referat.

Hæc omnia mihi probantur, & ex D. *Tourneſort Elem. Botan.* huc tranſtuli, ut oftenderem ipſum etiam agnoſcere, *Plantas poſſe congenereſ eſſe quæ ſloris, aut fructus ſtructurâ diſſerunt: & plura Attributa communia habere optimam eſſe convenientiæ Genericæ notam.* Tandem, nullam methodum Plantarum inſtitui poſſe, quæ ſpecies omnes complectatur abſque ulla anomalia aut exceptione.

Addo inſuper, me non videre cur neceſſarium ſit Florum aut Fructuum convenientiis adhærere in Notis generum, conſtituendis. Si aliæ partes clariores & maniſeſtiores notas fundant: cùm Flos & Fructus partes eſſentiales non ſint, ut ſuperius oſtendi.

Supereſt

**S**upereſt ut de D. *Tournefortii* methodo ſententiam meam paucis aperiam.

Primò, in Plantis earumque partibus obſervandis & diligens & curioſus eſſe videtur; ideòque notæ quas adfert Generum infimorum mihi plerunque probantur.

Secundò, Methodus ejus multis nominibus reprehenſioni obnoxia mihi videtur,

1. Quòd, cum pag. 59. in *Plantarum Classibus* ſeu *Generibus* à Florum differentiis determinandis eorum ſtructuræ ſeu formæ non petalorum numero adharendum eſſe dicat, in *Classibus* tamen quatuor prioribus petalorum numerum in ſocietatem Characteris admittit, proinde Herbas primaria diviſione in *monopetalas* & *polypetalas* diſtinguit; primaria, inquam, cum Diviſio formæ reſpectu, eam quæ à petalorum numero ſumitur ut pluribus formâ differentiis communem præſupponat. Prius naturâ enim, deſinientibus Philoſophis, eſt quod inferitur ſed non inferit.

2. Si in horum Generum characteriſticis numeri petalorum in flore ratio habeatur, cur in Genere Roſaceo, cur in Genere Libiaceo flore præditorum ejusdem ratio habenda non ſit? In explicatione Tituli *Classis* ſextæ ſeu *Rosaceo flore præditarum* hæc habet. Vide cur in Generibus hujus *Classis* conſtituendis plurium duntaxat petalorum mentio ſit, non determinati alicujus numeri; ob metum ſcilicet, ne numero illo non obſervato in ſpeciebus nonnullis quæ in poſterum fortafſe detegentur, Characterem Generis cogamur reformare. E.g. Neceſſarium Botanicis viſum eſt, in *Cisti* caractere includere, quòd flores ejus pentapetali eſſent. Verùm, quamvis hic numerus determinatus ſit in ſpeciebus jam cognitis, fieri tamen poteſt, ut aliquando inveniatur ſpecies aliqua, cujus ſlos vel ex majori, vel ex minori petalorum numero componatur, eodem prorfus modo, quo in *Caryophyllata*, *Pulsatilla* ſedo obſervatur, quæ pariter florem roſeum habent, verùm ex indeterminato petalorum numero conſectum. At idem metus eſt de Herbis flore monopetalo præditis. Unitas enim vel numerus eſt, vel initium numeri.

3. Quæ floris formâ differunt ad idem Genus reducit, ut patet in Genere nono ſeu Liliaceo flore præditorum, in quo ſpecies nonnullæ flore ſunt irregulari ut *Gladiolus*, aliæ regulari, & ex his aliæ flore ſtellato, ut *Hyacinthi ſtellati* dicti, aliæ urceolari ut *Hyacinthi botryoides*, &c. item in *Classe* ſecunda,

da, Sectione quarta, ubi Herbis monopetalis flore regulari *Echinum* annumerat, quamvis, ipso fatente, flore sit non undequaque; regulari. Item in Classis primæ Sectione quinta, cujus Genus tertium facit *Periplocam*, quamvis absolute loquendo eam Herbis flore *en rosette* annumerari debere agnoscit.

4. Quæ floris formâ conveniunt ad diversa Genera refert v. g. *Clematides*, quæ Botanicis omaibus consentientibus florem habent cruciformem à Classe quinta Herbas flore *cruciato* complectente removet, & ad Classem sextam, seu flore rosaceo donatas transfert. Sic Herbas nonnullas quæ floris formâ cum Boragine conveniunt, ut *Hyacinthi* & *Solani* species nonnullas, à Boragine procul removet, & rectè quidem, quia aliis partibus differunt, verùm Methodo suæ non consentaneæ. Deinde *Leucium maritimum* quoad Floris formam *Caryophyllum hortensum* proxima similitudine, me judice, refert, reliquis tamen partibus longissime ab eo recedit.

5. Quædam Genera triformia facit, velut *Hecates* quasdam ut, v. g. Classem II. & ejusdem Sectionem quartam. At hoc merè arbitrarium est. Nam nota characteristicæ Genèris alicujus, sive sit Proprietas quædam singularis, sive complexus accidentium, omnibus sub illò Genere contentis speciebus convenire debet. At in Classe seu Genere secundo species illæ quæ florem habent *en Soucoupe*; non habent florem *en Rosette*, vel *en Entonnoir*; aliàs enim frustra hac distinctione utitur. Eodem autem jure Genèrâ illa vel biformia, vel etiam quadriformia facere potuisset.

6. Quis quæso determinabit quousque se extendere debet florum in unoquoque Genere similitudo? quisque sit limes inter Florem v. g. *Caryophylleum* & *Liliaceum*? Certè Botanici plerique ab Autore nostro de eo dissentiuunt, cum *Alsinæ* species multas à flore, ut ipsis videbatur, *Caryophylleo* simili *Caryophyllos* denominarunt, quibus ille florem rosaceum tribuit. Ego autem Plantas Umbelliferas florem rosaceum proferre nunquam imaginatus fuisset, ni ille dixisset. Notæ autem Generum characteristicæ claræ, manifestæ & unicuique faciliè discernendæ sint oportet; non obscuræ, indiscretæ, & de quibus né Botanici ipsis inter se convenit.

7. In Classibus & Sectionibus aliquot Titulus generalis non convenit Generibus subordinatis. Sic Trifolii species nonnullas quas monopetalas flore irregulari esse concedit Classi decimæ cujus Titulus *Herba flore polypetalo irregulari* subjicit;



subjicit; cùm in Methodo sua ad Classẽ tertiam, cujus Titulus Herbæ flore monopetalo irregulari pertineant. Sic Classis secundæ Sectioni quartæ cujus Tituli pars est, quòd *Stylus è quatuor embryonibus componitur, quæ totidem semina evadunt, calyci floris inclusa*, pro duodecimo Genere *Plumbaginem subordinat*, cujus stylus unico duntaxat semine constat. Sic Classis octavæ titulus est, *Herbæ flore regulari, ex pluribus petalis composito*, &c. & tamen Sectione secunda sub Genere *Limonii* duas plantas collocat, quæ ipso fatente (p. 35.) monopetalæ sunt, nimirum *Limonium Hispanicum frutescens, Portulacæ marinæ folio*, & *Limonium Hispanicum multifido folio*. Novi quomodo hæc excuset; verum non satisfacit excusatio, cùm florem habere monopetalon & polypetalon sint contradictoriè opposita, nec possint conciliari. Oportet autem virum ingenuum apertè fateri has species à reliquarum norma abcludere, & florem polypetalum strictè dictum hujus Generis characterem ingredi non debere; sed tantum, si ita loqui liceat, polypetaloidem.

8. Methodus hæc conjungit plantas toto, ut ita dicam, cœlo distantes. Quæ enim similitudo est inter *Rosam, Papaver, Rutam, Ranunculum, Cistum*, &c. præterquam in florum forma? Quæ convenientia inter *Arum, Aristolochiam, Digitalem, Pinguiculam, Polygalam, Orobanchem, Acanthum*, nisi quod omnes florem monopetalon irregularem obtineant? Quenam affinitas *Epimedio, Potamogetoni, Herbæ Paris* vel inter se, vel cum *Tetrapetalis* filiquosis, excepto petalorum in flore numero & situ?

9. *Alchimillam, Percepiem, Knawel* ad idem Genus refert, quæ nulla fere in re præterquam quòd omnes flore sint stamineo, conveniunt. Foliorum figura, florum situs, segmentorum calicis numerus ut & seminum unicuique flori succedentium, omnia diversa, nè plura addam.

10. At nec mihi arridet Classis decima quarta *Herbarum scil. flore composito radiato*: cùm multæ plantæ manifestè congeneres, aliàs flore nudo sunt, aliàs flore radiato. Ipse p. 397. instat in *Cotula* seu *Bupthhalmo Valentino* Clusii, quæ interdum flore nudo est, interdum radiato. Ego idem observavi in *Eupatorio aquatico folio integro*, quæ apud nos frequentissimè folio est nudo, nec ullis barbulis cincto, non rarò tamen occurrit cum flore radiato, præsertim in Hibernia, ubi passim obvia. Datur etiam *Senecionis* Species flore radiato. *Chondrilla* insuper *carulea Cyani capitulo* C. B. sæpissimè flore

flore est radiato, reperitur tamen flore completo; & revera ex partium omnium constitutione, & succo lacteo, se congenerem esse Herbis flore planifolio natura pleno seu qui *portent des fleurs à demi-fleurons* manifestè prodit.

11. Classis nonæ, cui Titulus *Herbæ flore Liliaceo*, species, quamvis Genere convenire concedam, non tamen omnes florem Liliaceum aut ullo modo ad Liliaceum accedentem obtinent; ut in Epistola ad D. Rivinum monui.

12. Herbis flore regulari nonnullas annumerat quibus Definitio Floris Regularis minimè convenit, ut v. gr. *Hyoscyamum* & *Veronicam*.

Exceptiones & Objectiones contra Generum particularium Characteristicas Methodo meæ reservo.

---

FINIS.

---

